

平

書

二





書 平  
(二)

著 輝 篤 秦

叢書集 成 初 編  
(本印補)

書 平  
冊 二

一九三七年十二月初版  
一九五九年十月補印

秦 篤 輝  
商 務 印 書 館 出 版 著

上海華文印刷廠印刷

# 平書卷五

## 經學篇上

朱竹垞經義考引尙書考靈曜逸文春夏民欲早作故令民先日出而作是謂寅賓出日秋冬民欲早息故令民候日入而息是謂寅餞納日春迎其來秋送其去無不順矣按此深合敬授人時之旨孔沖遠疏寅賓寅餞專屬羲和此言教民賓之餞之下文東作西成俱有根矣

父爲子隱堯以丹朱爲嚚訟何也曰隱者一己之至情也不隱者天下之公義也

續用弗成孔疏祭法以鯀郭洪水列諸祀典功雖不就爲罪最輕按此極平允蔡傳不采昧甚

後漢書鄭興謂堯知鯀不可用而用之者屈己之明因人之心也

蔡蒙旅平錢氏時曰旅平水患既退行旅往來皆安平無險阻也荆岐旣旅亦同獨言於梁雍二州者九州惟二州山最多最險尤爲利害水平而行旅可以往來所以特書也專言山則平夷之路可知梁舉蔡蒙雍舉荆岐二州可以概見非止謂四山也九山刊旅刊去林木行旅可通九山則舉九州之山概言之也按此實勝以旅爲祭之說若祭當徧及山川不當獨舉山而遺川又不當獨舉蔡蒙荆岐也詩曰彼岐矣岐有夷之行卽旅平之謂也柞棫拔矣行道兌矣卽刊旅之謂也

漢孔衍安國孫疏安國得古文科斗尙書孝經論語世人莫有能言者安國爲改今文讀而訓傳其義又撰

次孔子家語既畢會值巫蠱事起遂閼廢不行按衍所論則古文尙書實安國以今文改之猶言譯釋耳以孫言祖爲至親切後世何疑古文之甚耶又家語係安國所撰則以爲王肅僞造者亦不然也

漢書儒林傳信都秦恭延君守小夏讀說文恭增師說至百萬言桓譚新論秦延功君說堯典篇目兩字十萬餘言但說曰若稽古三萬餘言按說經辭費如此得無嚴光買菜求益之譏耶

陟方乃死宋錢時融堂書解魂氣升於天之謂也謂之陟方者殆以明雖死而未嘗死也此惟覺者知之未覺不惟不知亦不信

女作士蔡傳以爾爲士師之官按士爲刑官之長即周之大司寇士師乃其屬官蔡氏誤以士當之其荒唐如此無怪後來時文家之沿訛也

商書曰與治同道罔不興與亂同事罔不亡此足食足兵民信之說也春秋繁露曰不由其道而勝不如由其道而敗此自古皆有死民無信不立之說也

庸蜀羌羣見於牧誓是蜀之通中國舊矣侈者乃有秦武王五丁開山之說  
微子之命不作懲創之辭信其德者深也

書文義有相屬者有不相屬者有可通者有不可通者後世不難加以穿鑿恐非其本意也

宋葛洪涉史隨筆虞書所謂肆赦者爲過誤而麗於刑者設也呂刑所謂有赦者爲刑罰之入於疑者設也未始有罪無輕重普赦之文也按此最深明經義

孔子曰。赦小過可見大罪不赦矣。蜀志諸葛武侯曰。治世以大德。不以小惠。故匡衡吳漢不願有赦。先帝亦言吾周旋陳元方鄭康成間。每見啓告治亂之道。悉矣。曾不語赦也。若景升季玉父子歲歲赦宥。何益於治。唐書太宗謂侍臣曰。古語有之。赦者。小人之幸。君子之不幸。一歲再赦。善人喑啞。夫養稂莠者害嘉穀。赦有罪者賊良民。故朕不欲數赦。此論真宜補入書傳。

怒如調飢楊用脩曰。韓詩作怒如朝飢。焦氏易林炳如旦飢語意甚合。按楚詞天問而快朝飽。快莫如朝飽。則怒莫如朝飢。對觀更顯。

無感我帨兮。麗史婦人服飾獨言帨者。按內則注云。帨婦人拭物之巾也。居則設於門右。佩則分之於左。常以自潔之用也。古者女子嫁。則母結帨而戒之。王漁洋曰。徐太室徑定野有死麌爲淫詩。甚有理。按詩明言有女如玉。明言無感我帨。是乃拒淫之詞。昭然揭白。何反以淫誣之。朱傳淫詩之說。方如狂瀾而不可挽。其未指爲淫者。復揚其波而汚之。誠何心哉。

驕虞凡三解。白虎黑文毛傳之說也。淮南道應訓散宜生得驕虞雞斯之乘。司馬相如封禪書固驕虞之珍羣。是皆以爲獸矣。禮記射義云。天子以驕虞爲節樂官備也。呂大臨曰。所以歸功于二官也。漢書序傳云。滕公廢驕。是驕乃掌御之官。戴埴鼠璞引月令命僕及七驕咸駕。左傳使訓羣驕知禮。謂驕爲驕御。虞爲虞人。是皆以爲官矣。賈誼新書。驕者文王之囿虞。虞官也。是又以爲囿官矣。三說皆出於漢。惟以驕爲囿。無他證據。

陟彼岵兮爾雅山多草木曰岵無草木曰岡劉公嘉話拾遺施士丐云山無草木曰岵所以言陟彼岵兮無可怙也以其無草木故以譬之朱傳想從施說然未見其確也如以無草木之岵比無父何怙下明言父曰嗟予子實有父矣愈覺牽強不通何取而易歷代相傳之古訓乎新唐書曰士丐傳春秋傳文宗喜經術宰相李石因言士丐春秋可讀文宗曰朕見之矣穿鑿之學徒爲異同但學者如浚井得美水而已何必勞苦旁求然後爲得邪斯言眞說經者之藥石也

夭夭是極楊用脩曰漢張衡傳引之云利方始萌害漸亦牙速速方穀夭夭亦加以速速對夭夭良爲有理今本作天恐係誤字

吳禮部詩話師道正傳衛武公抑戒賓筵二詩極言荒溝之失本以刺王而引以自歸至於喪亂回遹等語皆所不諱蓋所以致其警戒之切爾舊序之言爲是

奚斯所作古今韻謂作新廟經文甚明揚子雲班孟堅顏魯公皆誤謂作頌太史公謂正考父作商頌亦誤

有娀方將帝立子生商毛傳有娀契母也將大也契生商也鄭箋禹敷下土之時有娀氏之國亦始廣大有女簡狄吞鯉卵而生契堯封之於商後湯王因以爲天下號故云帝立子生商孔疏君子言人之美務欲加之因其國實廣大見簡狄爲大國之女猶大明之篇言攀莘也朱傳有娀氏始大故帝立其女之子而造商室也何氏楷曰契之封商雖帝舜命之而皆本於天意故歸之於帝立焉按以上諸說子皆指契

而言謂有娀氏女簡狄所生之子契也。契爲簡狄所生，簡狄爲譽之子無疑。至帝立子生商，語意猶天命元鳥降而生商云爾。乃陳氏兆峯齋別創一說，子女也有娀之國於此時而方大，是以帝立其女生契而封於商也。史稱有娀氏女簡狄爲帝譽妃，吞燕卵而生契。今此詩言禹平水土之時，有娀方大通於中國，則立子生商當在帝舜之時。魯語展禽曰：殷人禱舜而祖契，郊冥而宗湯。以舜爲契所自出，與詩言脗合，則史記不足信矣。陳氏直以契爲舜子，殊足駭人聽聞。果如所說，此事關係甚大，不應經傳別無明文，而獨見於魯語展禽一言，舜有契之聖子，乃不傳契而傳禹乎？天下朝覲謳歌訟獄者，何竟舍契而之禹也？孟子於使契爲司徒，教以人倫，津津言之，而顧概斥之曰：舜之子亦不肖乎？大戴禮記繫篇，帝娶帝堯之女，謂之女匱。註者以娀皇、女英、女匱爲三妃。漢地理志，陳倉有舜妻育冢祠。山海經，舜娶葬一作比氏，生宵明、燭光。夫二女之外，加匱、育、葬比，不經見者諸書猶紀之。舜果立有娀女爲妃，且又生契，而顧遺之乎？陳所據者魯語一言，考韋氏昭魯語註，舜當作譽。祭法曰：商人禱譽、譽契父商之先，故禱之。是韋氏據祭法正魯語，而舜字爲譽之訛。已爲鐵案不移。豈陳氏未覩韋註，或故隱其說，以逞奇談與？此恐結千古莫解之疑，故詳辨之。

禹敷下土，方外大國是疆。幅隕既長，有娀方將。帝立子生商，詩意明謂禹敷下土之時，幅隕既長，而有娀亦大。帝乃立其所出之子契而生商，將自古訓。大子自古指契。陳氏誤讀經文，以爲禹敷下土之時，有娀始通於中國，因以子訓有娀之女，可謂顛倒陰陽矣。至敍禹敷下土，謂契母家有娀之國於此始大，蓋契

之生久矣。非謂始生於禹治水之時，遂臆斷其爲舜子也。

黃東發曰：夫詩非序莫知其所自來。注者去千載之下，欲一旦盡去自昔相傳之說，別求其說於茫冥之中，誠難可據。按此譏朱子之廢序傳詩也。由此推之，凡宋人廢絀先儒自我作古之說，果盡可信乎？若黃氏者，可謂不黨矣。黃氏乃朱再傳之門人，其言易不信。邵之圖說言大學不信朱之補傳，真晦翁幹蠱門人。

池北偶談升庵引朱白鹿洞賦有曰：廣青衿之遺問，樂菁莪之長育。或舉以爲問，朱曰：舊說亦不可廢。然則考亭之盡去小序，終有不自安於心者乎？王漁洋又曰：紫陽解詩多失本意，其甚者如木瓜一章尤謬。輔廣童子問亦知其非，而不敢斥師說，則欲盡抹倒小序家語，尤爲可笑。又曰：程伊川云：小序是當時國史作，不然雖孔子不知。朱晦翁事事推崇伊川，獨詩傳力反其說，大不可解。

春秋隱公三年經文明書尹氏卒，而左傳乃作君氏。則公穀作尹氏爲天子之大夫者得之矣。然則左傳豈可全據而託公穀哉？但胡傳卽以爲詩所刺之尹氏恐亦未確。幽王之亂，豈尹氏猶得完然於東遷之後乎？或曰：襄公二十六年傳左師見夫人之步馬者問之，對曰：君夫人氏也可爲君氏屬夫人之證。然君夫人氏四字連綴成文，固不若君氏之簡要也。且舍經之尹從傳之君，有不卽人心者矣。

筮短龜長楊用脩曰：杜氏此註最謬。卜人蓋曰：筮之辭所言理短，龜之辭所言理長，故下文遂引龜辭卽立驪姬一事而言，非謂筮龜有所短長也。

繞朝贈之以策。楊用脩曰：策，書策也。子勿謂秦無人。吾謀適不用也。卽策文也。今以爲鞭策，非也。劉勰文心雕龍曰：繞朝贈士會以策。子家與趙宣以書。巫臣之遺子反。子產之諫范宣詳觀四書辭若對面據此豈鞭策乎？李白詩臨行將贈繞朝鞭。詩人趁韻之誤耳。按服虔已訓策爲書策。

襄公二十九年，吳子使札來聘。胡傳以爲季子讓國致亂，春秋貶之。夫讓美德也。公子光之弑僚所不及料也。奈何以致亂坐之？蓋季非嫡子，應得國之人，則其讓屬正理。孔子嘗稱之曰：延陵季子之於禮，其合矣乎？又題其墓曰：嗚呼！延陵季子之墓，而謂作春秋於其來聘與？讓國無干之事，忽斥其生平名而貶之，吾不信也。穀梁所謂成尊於上者，是也。

昭公五年，左傳既載叔孫穆子因夢牛而寵之，以致於禍。後又載穆子之生莊叔，筮之卜，楚邸斷其以讒入。其名曰牛，卒以餕死。此兆穆子獨不聞之乎？聞之而寵牛乎？若穆子不聞，左氏又於何聞之乎？由此推之，左氏之言禍福率以己意增飾，不足信者多矣。讀者但節取其理爲戒可耳。

人皆謂楚大夫僭稱公然，齊有棠公。見左襄二十五年傳是非大夫僭稱者乎？

吳仁傑兩漢刊誤補遺：魯昭二十五禱于襄公，萬者二八，纔十六人。其衆舞于季氏，則用六十四人。按俗本左傳二八八字誤人字，必無此理，當以此正之。

列子載鄧析鄭人操兩可之說，設無窮之辭，數難子產之政。子產誅之。呂氏春秋洧水大，有富人溺死，有人得富者屍，請贖而求金甚多。富人黨以告鄧析曰：但安之，必無買此者。得屍者患其不贖，又告鄧析曰：

但安之必無人更賣。蓋所謂兩可之辭如此。荀子宥坐篇說苑指武篇俱載子產誅鄧析。孔子家語始誅篇載子產誅史何何卽析耶抑別一人耶春秋左氏傳定公九年鄭駟歛殺鄧析而用其竹刑杜註鄧析改鄭所鑄刑書舊制不受君命而私造刑法書之於竹簡謂之竹刑如此則鄧析宜誅矣與傳後所云云不合杜說非是君子謂子然歛卽駟於是不忠苟有可以加於國家者棄其邪可也。靜女之三章取彤管焉竿旄何以告之取其忠也故用其道不棄其人詩云蔽芾甘棠勿翦勿伐召伯所茇思其人猶愛其樹况用其道而不恤其人乎子然無以勸能矣據傳則鄧析爲善而駟歛攘之而殺析者歟非子產也大叔代子產爲政駟歛、駟乞之子又代大叔事經再傳矣漢志載鄧析子一卷論者謂其說在申韓黃老之間大旨爲勢統於尊事覈於實則與操兩可之說以難政者又正相反矣。

無別之禍未有過於春秋者也懷羸秦穆之女也旣妻子圉復媵重耳而重耳亦甘受之獨不思其爲姪婦且甥女乎懷羸之號必懷公被殺謚之後國人所加不然亦必左氏取而號之重耳屬名思義能不赧然由此推之吳孟子之號陳大士謂爲國人所加其說信然鄭文公楚子之妹也以伐宋過鄭取鄭二姬歸二姬莘所生也獨不思爲甥女乎其他若齊人強昭伯通宣姜皆彰明爲之近於無愧不知恥之甚者至於閨昧之姦又不可勝述矣申包胥救楚戰國策作棼冒勃蘇。

疑古文尙書者多矣而以劉歆兩言斷之曰與其過而廢之也庸過而立之疑左傳者多矣而以程子一言斷之曰信其可信。

後漢書鄭元傳何休好公羊學遂著公羊墨守左氏晉盲穀梁廢疾元乃發墨守誠晉起廢疾休見而歎曰康成入吾室操吾戈以伐我乎按凡以後學攻前人者未有不深入其室者也亦未有不以矛刺盾者也但視心之公私理之是非耳若避此嫌甘使經義不明又豈有當乎

漢書言孔子作春秋有所褒譴貶損不可書見口授弟子弟子退而異言及口說流行故有公羊穀梁鄒夾之學

公羊傳徐彥疏引戴宏序曰子夏傳公羊高高傳其子平平傳其子地地傳其子敢敢傳其子壽至漢景帝時壽乃與齊人胡母子都著於竹帛何休之註亦同是自高四傳其元孫壽所作今觀傳中有子公羊子曰則爲壽所傳無疑穀梁傳楊士勗疏謂穀梁子名淑字元始一名赤受經於子夏所自作而徐彥作公羊傳疏謂穀梁亦是著竹帛者題其親師故曰穀梁傳今觀傳中有穀梁子曰則爲後人所傳但其淵源必出于子夏耳或謂公穀皆漢文恐亦不然漢儒謂左氏先著竹帛爲古經理或然與

鍾伯敬謂穀梁載桓公之言曰同非吾子左傳又云是其生也與吾同物因憶焦氏易林有云三夫共妻莫適爲夫子無名氏翁不可知不覺失笑按同非吾子云云出公羊非穀梁也公羊謂公謫之夫人譖公于齊侯公曰同非吾子齊侯之子也正姜氏譖公之辭不得據爲事實而疑同非桓子也子同生朱子辨之已詳此說歧而又歧矣

伊川春秋傳序游夏不能贊一辭不待贊也言不能與於斯耳按不能贊一詞不過謂聖人筆則筆削則

削一字之嚴不可假易雖以游夏之賢不能贊助極形筆削之當耳非痛抑游夏謂其不足與於斯也不然春秋屬商夫子已明言之矣又作何說乎大抵道學家心氣過高往往卑視諸賢其論古也每失之不平其論今也每失之不允祇可籠絡耳食之人不能欺蔽心得之士也

賢者狎而敬之畏而愛之謂人於賢者當然耳蓋賢者嚴氣正性既患其不狎狎矣而又必敬敬斯畏矣而又必愛也

伯邑考他書謂文王長子據檀弓引爲舍孫立子之證則係文王長孫也註家仍指爲長子則與本文不順他書謂微仲爲微子之弟檀弓謂爲庶子亦與諸說不合此皆可備參考

曲洧舊聞王介甫初侍經筵上欲令講禮記至曾子易簀事倉卒進說曰聖人以義制禮其詳至於牀第之間君子以仁行禮其勤見於將死之際上稱善安石遂言禮記多駁雜不如講尙書按介甫深於經學卒誤天下言不可據如此其謂禮記駁雜置而不講亦非也

子張病召申詳而語之曰君子曰終小人曰死吾今日其庶幾乎卽曾子得正而斂之旨

子思之哭嫂也爲位然則子思爲伯魚之庶子與

曾子責子夏之過三俱在疑似之間聖門規過之切如此而子夏可責祇此數事復受責不辭生平制行之高亦可見矣

宋儒專稱曾子而檀弓載子游有子勝於曾子者不一可見於諸賢大作軒輊者皆後儒門戶之見其實

不然也。子夏曰吾過矣吾過矣吾離羣而索居亦已久矣。曾子曰我過矣我過矣夫夫是也此聖賢所以爲聖賢也。

祭法夏后氏禘黃帝而郊鯀金仁山謂必夏之中葉禹宜奉舜祀其後以天下爲家始自祖其祖。

郊特牲大夫強而君殺之義也由三桓始也。鄭康成註以三桓指季友之殺叔牙與慶父陳氏宗之明管登之謂必三桓受誅於魯君但文獻失考耳按孔子云三桓之子孫微矣諸書所載春秋以後不及三桓一語費惠公必另一小侯與季氏無涉若季友殺叔牙慶父以桓殺桓不當統云三桓管氏之見良允禮記載成王襪褓之說先儒多疑之方望溪據金縢王與諸大夫盡弁一語斷之及閱竹書紀年成王之立已冠尤見金縢有據而禮記可疑但方氏謂劉歆所竄亂以助王莽居攝之篡然賈誼疏已有成王幼在襁褓之中一言豈始于劉歆耶大抵漢初已有是說而古事之難質斷如此類者多矣。

禮記曾子問亦漢儒假託之詞也孔子沒在季康子前何得康子之謚而稱之與縕衣子曰內引葉公之顧命同一破綻。

大傳追王大王亶父王季歷文王昌不以卑臨尊也乃文王未嘗有及身稱王確據凡稱王者皆追尊之詞而鄭康成註必曰文王稱王早矣于殷猶爲諸侯夫既爲諸侯猶必謂稱王早何耶且泰誓祇稱文考不曰文王尤未嘗稱王之證也其曰文王受命中身者蓋指天命歸周言豈爲稱王之據哉。

吳昌宗四書經傳集證禮經解易曰君子慎始差若毫釐繩以千里乃引易經緯書之言坊記亦漢儒之書觀其引子云又錯出論語曰可見

情欲信辭欲巧鄭註巧謂順而說也孔疏君子情貌欲得信實言辭欲得和順美巧不違逆于理與巧言令色者異也按鄭孔之解自確王氏梁執巧言令色鮮矣仁之說謂此決非孔子之言陳氏集說遂謂巧當作攷謂稽攷古道悍然改經已忘卻情欲信一言矣情不信而求辭巧則鮮矣仁情信而辭不巧則言之無文行而不遠孔子脩春秋其情可謂信矣六鵠退飛過宋都墮石于宋五辭可不謂巧乎推之六經之詞皆巧也孔子謂草創討論修飾潤色卽巧之則也不知此而北宋以後之文無怪其皆流于語錄也潛邱劄記苟卿言三年之喪人道之至文者也是百王之所同古今之所壹也未有知其所由來者也小戴緝入經又言殺人者死傷人者刑是百王之所同未有知其所自來者也班固採入史

後人之尊宋儒抑漢儒至矣而不能不以禮記爲經亦知禮記實多漢儒之文耶則漢儒已託乎至尊矣豈宋儒所可掩哉

周禮春官大司樂大咸註大咸咸池堯樂也路史堯作大章之樂禮記註亦同豈堯有二樂耶抑一樂二名耶禮記謂咸池黃帝之樂

邢昺孝經疏謂孔子假立曾子爲請益問答之人以廣明孝道真枉見也焉有自著名之爲經者乎有自著直稱子曰者乎夫子于門人名而不字有稱曾子者乎假立之說尤屬不通其爲朱子門人紀述無疑

矣。注疏多闇諸如此類。

南平世家漢田敏以印本五經遺從誨。從誨謝之曰：予之所識不過孝經十八章爾。敏曰：至德要道如此足矣。

魏志夏侯勝有言：士病不明經術，經術苟明，其取青紫如俯拾地芥耳。按經術非爲取青紫計，然以此取之，固勝于他。但有要焉。曰：正心術耳。心術不正，則所謂明經術者皆邪慝也。

顏氏家訓漢時賢俊皆以一經宏聖人之道。上明天時，下該人事，用此致卿相者多矣。末俗以來，不復爾空守章句，但誦師言，施之事務殆無一可。又云：聖人之書所以設教，但明練經文，蘊通注義，常使言行有得，亦足爲人何必仲尼，卽能通兩紙疏義，燕寢講堂，亦復何用？以此得勝，庸有益乎？光陰可惜，當博覽機要，以濟功業。按此可爲得讀經之要法。

唐書開元中祭酒楊場上言：主司帖試明經，不務求述作大旨，專取難知，問以孤經絕句，請自今並帖平文從之。新唐書楊場傳：有司帖試明經，不質大義，乃取年頭月尾，孤經絕句，恐諸家廢無日。請帖平文，以存家學。按此關經學甚鉅。夫舍大義而專務難知，是驅經術於小巧無益之途，而壞人材不小矣。宋陳師錫字伯奏徽宗曰：六經載道，諸子談理，歷代史籍，祖宗圖畫，天人之蘊，性命之妙，治亂安危之機，善惡邪正之迹，在焉。以此爲圖，天地在心，流出萬物，以此爲畫，日月在目，光宅四海，觀心于此，則天地冲氣生焉。注目于此，則日月祥光麗焉。心以道觀，則正目以德視，則明。

孔子之後伯魚子思世濟其美。子上之曾孫子高名穿平原君稱其理勝於辭。子高之孫子魚名鮒避秦禍藏書於壁。陳勝尊以博士爲太師。見孔叢子皆大儒也。漢有子國名安國。唐有沖遠名穎達。闡明經學。作爲注疏。是爲孔子之家傳真學。後儒每以無稽之談。結爲死黨。掩出二孔之上。豈不枉哉。

唐書載孔穎達直諫宋史載宋真宗得天書以問孫奭。對曰：臣愚所聞天何言哉。豈有書也。其忠過王旦遠矣。孔氏爲九經正義。孫爲孟子音義。此真無愧于經學者。至孫氏孟子疏。先儒多譏其僞。雖其中亦有可取。不逮諸疏遠矣。必非孫氏作也。

范甯謂王衍何晏清談之罪深于桀紂。王伯厚曾辨其誣。閻百詩潛邱劄記猶沿范氏之謬。

歐陽永叔論刪去九經正義中讖緯劄子。謂正義多引讖緯之書。以相雜亂。怪奇詭僻。所謂非聖之書。異乎正義之名。乞特詔名儒學官悉取九經之疏。刪去讖緯之文。使學者不爲怪異之言惑亂云云。其論似正實亦不盡然者。緯書固多駁雜附會之言。然其粹語亦多。縱不出于孔子。未必非自古所傳。前人論之詳矣。卽如蓋寬饒引易傳言。五帝官天下。三王家天下。家以傳子孫。官以傳聖賢。此易緯文也。求忠臣必于孝子之門。此孝經緯文也。子之於母。絕少分甘。此孝經援神契文也。是皆千古名言。不減于六經者。可盡廢乎。且緯書通卦驗有云。正其本而萬物理。失之毫釐。差以千里。漢儒引之作君子正其始。萬物理差之毫釐。謬以千里。今禮記經解易曰。君子慎始。差若毫釐。謬以千里。實易緯之言也。然則緯書不獨載諸注疏。並儼然列于經文。欲刪注疏。將并經文而刪之乎。是其勢有所不能行矣。况歐公特借刪緯爲名。而

其劄子前云殘編斷簡出于屋壁餘齡昏眊得其口傳去聖既遠莫可考證是自經文以至漢儒皆全斥之不知尙書及他經縱有斷簡周易固完然無恙也歐氏不信十翼爲孔子作謂係易師附益之言並不信有河出圖洛出書之事是並論語而疑之充歐氏之類舉凡聖人之經無一可信又何論緯書更何論漢儒自歐氏一倡此論王介甫乃敢于作新義鄭樵遂謂漢儒之禍經烈于秦火而南宋後異說蠭起注疏竟束之高閣舉孔子以來一脈相傳之經學至宋蕩廢殆盡豈非歐陽氏一言階之厲哉但孔沖遠諸儒作正義筆太煩冗且所駁之義往往有勝于所取者然終賴其廣收博采傳示後人誠經學之淵海也得一明者擇而出之以爲標準而附以唐宋後諸儒精粹之論泐爲一書則盛事矣

後人說經只知專宗朱子凡與異者皆不敢取而不知非朱子意也朱子論科舉有曰使天下士子各通五經大義出題目使寫出註疏與諸家之說而斷以己意朱子重註疏如此果依其法何經之不可明蓋朱子一家說經之言雖優于諸儒不能盡經之蘊悉有是而無非者勢也無奈後儒以私心奉之其故大約有四厭註疏之舊而喜朱說之新一也憚註疏之煩而樂朱說之簡二也愛附朱子理學之大名遂忘孔子相傳之本義三也藉以圖科舉有明知其非故昧而從之者四也朱子所學之正首在于惡功利而後人專以其書爲功利豈朱子之所及料哉

明太祖定科舉之制原係漢唐註疏與宋儒之書並列學宮無所偏主詳朱竹垞經義考後永樂纂國使胡廣纂諸經大全廣性最詭訛因朱子爲永樂國姓遂闢漢唐諸儒衆說專以朱子爲宗顧亭林諸人所謂大全

乃至不全之書也。廣原名靖，與周是脩、解縉等約死建文之亂。是脩子謂胡叔能死亦大佳事。是脩聞靖問家人云：曾飼豬否？笑曰：一豬尚不能捨，肯捨命乎？後與縉子約婚，因縉得罪，遂欲背婚。蓋反覆之小人，無過于廣者。尤展成看鑑偶評云：永樂時，胡廣爲人佞巧，或投以詩云：漢朝胡廣號中庸。今日中庸又見公，堪笑古今兩奸宄。天教名姓正相同，可發一笑矣。今諸經經朱彝尊、毛奇齡等辨正，我朝欽定各經，破除門戶，皆得正宗。且頒十三經註疏于學宮，俾士子講習，美矣。盛矣。惟四書俗講猶沿胡廣大全之誤，蒙蔽學者耳目。夫孔子最惡鄉原鄙夫，而永樂卽以鄉原鄙夫之尤如胡廣者提舉經學，流毒後世，吁可歎也。

紀文達公曰：易之象數，詩之小序，春秋之三傳，或親見聖人，或去古未遠，經師授受，端緒分明。宋儒曰：漢以前人皆不知，吾以理知之也。果有是理哉。

或曰：漢宋之說紛紛，若持其平五經當主註疏，四書當主朱註，曰：五經之與四書，果若是歧乎？四書者，五經之鈴轄也。故必通五經，然後可通四書焉。謂五經則有是有非，四書則有是無非之理。今試約舉之。五十以學易，明指易爲日用之理。朱子本義專主卜筮及雜入邵氏圖說，諸條不可混入矣。書云孝乎，惟孝爲句。朱註書云：孝乎爲句，不可宗矣。思無邪，決無淫詩。朱集傳諸說不可雜入矣。九合指桓公九次會合諸侯。朱註改作糾合，非矣。大學宜確宗古本註疏，今本謬矣。凡此皆與五經切相比附，安得謂四書有是無非乎？持平而論，五經四書漢宋皆有得失，惟擇其是者宗之，勿執成見，不分黨與，一以經文本義爲主。

兼取漢宋之說，則庶乎其可也。

宋儒功專在四書，其于五經固多疏略。觀程子謂論語孟子既治六經可不治而明。朱子謂六經工夫多，得效少。其然豈其然乎。

蔡聞之跋漢書匡衡傳贊曰：明季多尊漢儒，而薄宋儒。不知漢儒重在講解，宋儒重在操履。則程朱之澤較宏也。夫漢儒之操履如諸葛孔明、賈長沙、董江都、黃叔度、鄭康成、管幼安。若而人豈在宋儒之下，必以匡衡、張禹輩槩漢儒無操履。專以講解抑之，不知宋儒並匡張不如者多多矣。此皆門戶私見，豈公論哉？說經之妙全在虛而與之委蛇。朱子謂解書不可謂孔孟已往不會說話。一任己見說將去。朱子解經入妙處，深得此祕。故每使口吻如生，然猶憾其尙多任己見處。

孔子之道大矣。後儒各以所見說之，猶管之窺天，蠡之測海也。謂天海不廢管蠡，則可。謂管蠡能盡天海，則不可。況屈天海以從管蠡乎。

唐以前之說經也博，其失在冗煩。宋以後之說經也精，而其失在武斷。自漢以後，儒者每涉于老。自宋以後，儒者每涉于禪。凡事莫樂于衆見，亦莫危于衆見。古今學術之受攻，最甚者，皆其宗仰最甚者也。

司馬溫公曰：經猶的也。一人射之，不若衆人射之。其中者多也。吾亦曰：道猶器也。一二人傳之，不若衆人傳之。其知者廣也。

孔子幹也。七十二子子思孟子枝也。漢宋諸儒葉也。諸家之文則華也。葉與花足以榮枝幹亦足以掩枝幹。後人知有諸儒而忘孔子及七十二子。是守花葉而忘枝幹也。

經字無文義可通者亦當闕其疑。有文義可通但以我之意見改之安知我是而經獨非乎。豈孔子闕疑慎言之教乎。經書中曰衍文曰誤字曰錯簡施之無文法可通者則可。若憑我之私見曰衍曰誤曰錯安知已所改之非衍非誤非錯乎。

古人有古人文法。後人有後人文法。大抵古人之文多奧似詰屈不可通。其中精蘊實深。後人之文甚明。每直瀉無所蓄。其中意味實淺。自宋以來。每以後人之法解古人之文。謔謔焉以爲獨得也。亦弗思甚矣。東周以來何孔子之少。北宋以後何孔子之多。

宋賢事彙邵伯溫少時讀文中子至武侯無死禮樂其興乎。因著論以爲武侯霸者之佐恐于禮樂未能興康節先生見之怒曰以武侯之賢安知不能興禮樂。後生輒譏先賢亦不韙也。伯溫自此不敢妄論。按宋儒議論最苛于聖門七十二賢顏曾閔冉數子外無不遭其深文詆訶。幾于喪心病狂者所爲程伊川嘗謂人當于有過中求無過。不當于無過中求有過。此論最尤。夫待今人且不宜苛刻妄詆。況古之賢人乎。然伊川亦行不掩言者也。閱康節之論感而書此。

講學易流于爲人考據實純乎爲己。講學有弊考據實兼注疏講學之長而無其偏黨門戶滯泥空疎之習。第廣狹醇駁究存乎人之自取不可假也。

秦皇焚經而人道闕。隋皇焚緯而天道荒。

御史臺記。太學博士姓張。昌宗之族叔。精五經。博於時事。夫五經而懵。豈經使然哉。亦不精之過耳。讀書尤貴知所擇。能知所擇。則會而通之。雖稗官野史。佛乘道藏。未必無益也。不知所擇。則拘而泥之。雖聖經賢傳。漢箋宋註。未必無損也。

元文宗至順元年。封顏子爲復聖。曾子爲宗聖。子思爲述聖。孟子爲亞聖。復蓋取諸易繫詞。不遠復。顏氏之子。其庶幾乎之義。宗聖蓋取韓昌黎。惟曾子得其宗之義。述聖蓋取中庸子述之義。亞聖蓋取趙岐孟子題詞。命世亞聖之才義。

四部代積。茫如煙海。新說漫出。古義寢微。

本朝四庫收羅數倍前代。分應刻應抄存目三等。大抵發明古義者多取之。自出新裁者多黜之。亦不得已之砥柱也。

宋儒說經。好爲新解。妄斥漢儒。朱子卻不甚菲薄鄭康成。

李石曰。王弼注易。刻木偶爲鄭康成像。見其所誤。輒呼叱之。果如此。宜弼之天矣。人傳郝京山著九經解。亦刻朱晦翁像。遇正其誤。輒以筆擊之。此謬言也。後人正先儒之誤公也。詬斥則惡矣。仲興之明。必不爲也。且九經解具在。亦未嘗專于駁朱。

世傳郝京山著論語解。多易朱註。忽地裂有物。啓視則朱子註第幾次不用之稿。與郝說同。無論荒唐不

經卽朱果前後有數稿後勝于前者固多前勝于後者正復不少卽諸家詩文皆然姑以此破拘墟之見朱子傳易冠先天圖袁機仲林黃中爭之傳詩廢小序呂成公爭之宗無極陸文安爭之然萬世之公論不以朱爲是也是故事以合聽而明

呂成公宋儒之最平允者也朱子廢小序說詩成公力爭之成公卒朱子轉激而爲詩傳改大學訂論語刪孝經而成公不及見矣成公卒朱曰齋了許多鶻突道理去了至今觀之成公之鶻突猶或少也澗泉日記朱先生懲談高說妙之弊只教人讀書尋義理爲學其尋行數墨又拘拘以論說爲學其弊反不足以成己教人豈非難事按數語平允無南宋人搢槃習氣又曰朱元晦強辯自立處亦有膽略世人以程朱並稱其實程優于朱遠甚伯淳天分極優惜早世未克大成正叔與周茂叔游太極圖終身不挂口與邵堯夫游先天圖終身不挂口可見確有定見不爲異說所惑說詩宗小序說大學宗古本亦無不知妄作之弊皆非朱所及也揆諸聖門已到可與立境候惜未能權以化其拘耳時中之說出于孔子時措之說出于子思時勢之說出于孟子拘儒乃不審時度勢而一斷之于理夫理之義取于玉文順其玉之文斯爲理逆其玉之文斯非理然則理卽時之順勢之順者而已違時逆勢卽非理矣堯舜有揖讓之時勢因而揖讓理也湯武有征誅之時勢因而征誅理也易之斯非理矣至于殺身成仁之事似乎違時逆勢乃全一己之節亦理也若治天下而不因時勢皆非理也後世之理學其非理亦多多矣國不可建而必欲建之田不可井而必欲井之古禮古樂必不可復而必欲復之皆非理也

聖賢所重者躬行文義淺焉者也後儒于十三經文義淺淺者尙多失其句讀侈然以聖人自命蚩蚩者亦以聖人奉之蒙所大不解也

朱元晦一生論人之刻其深文周內千古人物被其鍛鍊幾無完膚似乎剛者乃遇一救趙汝愚事便心寒氣餒藏頭縮頸而不爲剛者果如是乎

宗陸象山主靜之說者每墮入禪寂然象山非禪寂也宗王陽明良知之說者每流入猖狂然陽明非猖狂也且如劉忠節宗周孫徵君奇逢鹿忠節善繼湯文正斌皆當代眞儒實宗陸王之學者又何可以流弊歸咎于陸王乎而自宋方回留夢炎以後鄉原鄙夫窮凶極惡無非自命宗程朱者豈可以此罪程朱乎願持門戶之見者分別觀之核實論之斯允矣

孔子謂言豈一端亦各有所當也聖賢教人隨事而發初無一定宗旨令人舉一廢百良知自孟子之一說其實開導多方不勝枚舉王陽明必執此一說以標宗旨偏執可笑然攻之者必謂其爲異端亦偏也總之講學家多客氣假名義道德之名以行其克伐怨欲之實固深可戒耳講學最不可標宗旨萬不得已宗孔門忠恕二字最爲無弊又不如慎獨二字尤爲不言躬行萬全無弊也

朱元晦之學似實而虛陸象山之學似虛而實學元晦者知十行每不逮其一學象山者行每與知合故陽明起而知行合一孫徵君鍾元湯文正斌皆宗陽明者也詆陸王者試平心思之

池北偶談王文成公爲明第一流人物立德立功立言皆踞絕頂康熙中開史館秉筆者訾謗太甚亡友

葉文敏方時爲總裁。予與之辯論。反復至于再四。二十二年四月。湯侍讀荆峴斌對上以致良知之說。與朱子不相刺謬。且言守仁直節豐功。不獨理學上首肯曰。朕意亦如此。睿鑒公明。遠出流俗之外。史館從此其有定論乎。

天地間有正氣。有邪氣。判然各別。人得而辨之。惟客氣則附乎正氣以行。其邪氣人不得而辨之。聖賢之學在培正氣。以除客氣。故曰。矜而不爭。羣而不黨。故曰。無克伐怨欲。無意必固我。自宋儒道學道統之說興。則每以客氣爲正氣。至附道學爲門戶。以相爭者。則統乎客氣矣。

孔子之道在明。而後儒多闇。孔子之道在誠。而後儒多詐。孔子之道在恕。而後儒多刻。孔子之道在改過。而後儒多怙過。孔子之道在時中。而後儒多不中。孔子之道在述而不作。而後儒多無知妄作。孔子之道在無意必固我。而後儒多克伐怨欲。孔子以戒懼慎獨爲敬。而後儒以主一無適爲敬。吾不知之矣。世有大患三。曰謬。曰拘。曰妄。孔孟之教。正其謬。化其拘。挽其妄。在博文約禮。主敬。博文故達。達故不謬。約禮故中。中故不拘。主敬故謙。謙故不妄。後世自詡孔孟者。以謬益謬。以拘益拘。以妄益妄。

古今對勸學者。誘以道德之精微。此爲上性言之。非所以語中下者也。今之學。不過爲利而勸。爲名而脩。因其所爲而引之。則易入而易進。齊顏之推家訓曰。有學藝者。觸地而安。自荒亂以來。雖百世小人。知讀論語孝經者。尙爲人師。雖千載冠冕。不曉書記者。莫不耕田養馬。以此觀之。安可不自勉耶。若能常保數百卷書。千載終不爲小人也。謬曰。積財千萬。不如薄技在身。韓退之爲其姪符作讀書城南詩云。金璧雖

重寶費用難貯儲學問藏之身身在卽有餘是二說者最得其要按此說固然終當以正心術化氣質通時務爲讀書之本上性無論卽中下之受益較名利不可同年而語矣

古今第一妄人爲呂留良伊生七年而明亡與明原無君臣之義不可解之節旣入本朝甘爲逸民亦無不可乃應試入學是爲本朝臣子矣復爲日記醜詆本朝以致剖棺焚尸覆宗絕祀謂非膏火自煎者哉其所著書惟批選時文藉以講學其所宗仰惟朱考亭于六經亦不知爲何物惟知有四書自漢唐諸儒之說一無所覩閭百詩嘗笑呂晚邨四書集註外不知更有何書實深中其孤陋之病夜郎自大天蓋名樓天蓋者謂不履本朝之土也其樓果不著土而成倚天而立者哉妄而極愚亦已甚矣悍然自命爲考亭以後一人以道統自命其無知之門徒黏鰐逐穢將其說纂爲天蓋樓語錄專以攻陸子靜王陽明爲事其說之偏駁矯誣不可枚舉亦無足論今試取二公之實行與留良較之子靜一生篤行事君誠敬荆門軍德政彪炳史冊陽明攻劉瑾平宸濠有大功于時留良居下訕上犯義干名是陸王忠留良不忠矣子靜陽明守身行道百世流芳其父母長有餘榮留良覆宗絕祀永載刑書是陸王孝留良不孝矣不忠不孝尙何學之講何道之任況以不忠不孝之人極力攻大忠大孝之人滅絕天理宜乎其遭天誅也夫彼蚍蜉之撼何損大賢徒自禍耳不可深爲妄人之戒哉至其以時文講道尤屬可笑斯道首戒功利時文乃功利之尤者摭拾浮詞附會譏說拾火塞冰事同兒戲又不足責矣



# 平書卷六

## 經學篇下

道光丙戌十月寓漢皋怡雲樓讀李穆堂先生集一遍深服其經術文章卓然彪炳所學大抵宗陸子靜王陽明因是與朱子議論牴牾予嘗憾宗朱者門戶之私太甚哆口斥陸王爲異端于穆堂則所憾又異矣因世儒之攻陸王激而護之猶可言也因世儒之袒朱子槩爲斥之不亦偏乎學者讀書務空成見惟其是者宗之非者辨之而爲棄短而取長不爲矯枉而過正惜乎以穆堂之明尙未免以偏易偏也余特撮舉其原文大要而附識管見于各條之後此惟期于心得有裨益毫非爲門戶起見也

### 原學

#### 學主于效法就行言不就知言

學自以兼知行爲尤若謂專就行不就知言大學何以言致知子夏何以稱日知其所無爲好學有專就行言者如不遷怒不貳過之類是也然亦必知其怒而始不遷知其過而始不貳則行仍不能離知也易曰顏氏之子其殆庶幾乎有不善未嘗不知知之未嘗復行也明兼知行說穆堂豈忘之耶

天生之則本于良知孩提之童無不知愛其親及其長也無不知敬其兄惟患不行不患不知

孟子之言專就孩提少長言之使人反其初心耳其實氣拘物蔽以後不知親親長長者正多不教其

### 知安望其行

效先生之教亦非導之以知止于親書冊而勤討論也。

不先導以知必不知如何行謂不止于親書冊勤討論固是若以書冊討論爲支離無益則六經可一筆勾矣。

聖門好問者無若曾子而夫子所告在于一貫博學者無若子貢而多學而識夫子非之。

曾子若非書冊討論貫何物乎試讀禮記曾子問一篇正書冊討論實據也孔子之所謂非者謂非徒多學而識而有一以貫乎多學之中耳若竟以博學爲非夫子何以又言多聞多見何以言好古敏求對哀公何以言博學之穆堂蓋誤會非字耳餘詳予經學質疑錄。

其教弟子也以孝弟謹信親愛爲主必餘力乃學文其在成人也以志道據德依仁爲先而游藝則居末孝弟謹信親愛豈全不用知志道便兼知行二章以重輕分先後不可劃定次序爲先後也以志道章屬成人是以孝弟章屬幼學亦沿俗說之訛詳經學質疑錄。

先以敏事慎言而後就正於有道以爲好學。

敏慎就正皆兼知行言。

夫子拱而尚右二三子亦尚右則以爲嗜學。

禮記載夫子拱而尚右爲有婦之喪門人不知從而尚右因夫子言改而尚左蓋吉尚左凶尚右也據

此正見不知而行其行必誤而知之當先審矣。程堂反以爲學專屬行不屬知之證不亦左乎？孔門弟子夫子獨稱顏淵其好學之實則曰不遷怒不貳過行也非知也。

辨見前。

蓋古未有以學爲知之事者至朱子始以學問思辨俱屬知因以窮致事物之理爲格物又以大學未詳言格致之事也因疑其義亡而爲傳以補之于是古人爲學之法乃一變尋章摘句之弊流爲玩物喪志斷斷于口耳之間舉古人躬行實踐之學不得而見之。

使從古未有以學爲知之事自朱子始則朱子真開天明道第一聖人矣不知朱子實本古人之成法教人不以爲功乃反以爲罪乎惟其然愈授偏祖朱子者之口實並朱子之議論未當者一譏之如嚴城而不可解也朱子以窮致事物之理爲格物本確不可易特不知格物之義已詳具于大學首章而誤爲補傳耳然此亦過于求詳之失而非有背道而馳之差也躬行實踐正朱子所以教人切要之旨全書可覆按也卽以大學章句論致知格物祇一項而誠意正心脩身齊家治國平天下其見于躬行實踐者凡六目何謂古人躬行實踐之學不得而見之乎玩物喪志三代後不善讀書者便蹈此弊而漢魏以降溺于辭章者尤甚如何獨歸咎于南宋後之朱子

學記稱大學之教時教必有正業退息必有居學不學操縵不能安弦不學博依不能安詩不學雜服不能安禮不興其藝不能樂學四者之中並無誦讀講論窮理格物之說其論學之弊也則曰今之教者呻

其佔畢多其訊言。又曰。記問之學不足以爲人師。然則專務讀書博學強記。以爲窮理格物之事者。皆大學之所戒也。

正業居學。皆兼知行。言學操縵。知操縵者也。學博依雜服。知博依雜服者也。謂無誦讀講論之說。則禮記云。春秋教以詩書。不誦讀可乎。孟子正講良知家之所藉口者也。何以又言誦詩讀書知人論世乎。佔畢記問。亦對當日末流之弊言。非謂佔畢記問竟可廢也。且學記明云。一年視離經辨志。非知而何。九年知類通達。強立而不反。謂之大成。則大成亦知行並進之極耳。穆堂又當作何解。而爲學專行。不屬知之說乎。

朱子之以效釋學也。曰。後覺者必效先覺之所爲。乃可以明善。而復其初。是先行而後知也。其補格致傳。則曰。大學始教。必使學者卽凡天下之物。莫不因其已知之理。而益窮之。以求至乎其極。是又先知而後行也。物理固不可窮。又一人所著。彼此互異。後學之士。何所遵守。然則效吾心之天。則效先覺之遺。則遵訓效之解。而一力于躬行。雖違大學之章句。而合于論語之集註。學之義既不荒。其于朱子之說。亦可以無戾矣。

必效先覺之所爲。效字原兼知行。故以明善復初兩意詮之。明善爲知。復初爲行。何嘗是先行後知。以大學之序言之。格物致知。是明善誠意正心脩身。是復初。朱子論語集注與大學章句。何嘗彼此互異。恪遵訓效之解。而一力于躬行。舍知何以爲躬行。是其于論語集注。未必合。學未必不荒。于朱子之說。亦可以

未必不戾也。且以孔子之言斷之一則曰、由誨女知之乎。再則曰、知德者鮮矣。告哀公明言明善。或生而知之。或學而知之。或因而知之。或安而行之。或利而行之。或勉強而行之。明以知行分舉。而強辭奪理者。必將知一層打沒。則與孔子異乎同乎。謂朱子格致補傳。卽凡天下之物云云太泛則可。因此必抹煞知。豈非惡噎而廢食也哉。

自宋南渡以後。學者不務其所當務。而疑其所不必疑。不汲汲然患其知之而不行。而鰥鰥然患其行之而不知。溺其志于章句訓詁之煩。而駕其說于意見議論之末。置其身于日用彝常之外。而勞其心于名物象數之中。未嘗一日躬行實踐。而翹翹然自以爲講學。吾不知其所講者何學也。

此論最足以針講學末流之失。然其咎在于知而不行。豈可因此並舉知而廢之也。章句訓詁。名物象數。果爲日用彝常起見。亦何可略。

試取孟子所謂本心良心者。一體察焉。有不茫然思惕然懼者。必非人矣。孟子曰、仁也者。人也。學爲仁。所以學爲人也。又曰、學問之道無他。求其放心而已矣。

舉孟子本心良心之說是矣。但孟子言擴充必言察識。言求放心必言學問。言由仁義行必言明察。而于行之不著習矣。不察由之而不知其道者。斥之爲衆。則安可舉講習討論而皆廢之。單求所謂本心良心者乎。學問之道是一句。須讀斷。凡親師取友書冊討論之功皆備。因恐人將學問徒視爲口耳之爲外鑠之事故。以無他求其放心而已矣。指出切要關頭。所謂深造以道。左右逢原。博學詳說。以反說

約其理皆渾括于此。若誤連讀。謂求放心之外。別無所謂學問。則于孟子一切語言。皆不可通矣。舉一廢百。屈經就我。其害在不識孟子句讀。始可見章句訓詁。必不可廢。而講習討論。以求知誠先務也。吾一日之間。自昧旦而起。至寢息而止。心發一念。卽加審察。爲理耶。卽奮然直前。爲欲耶。卽毅然斷絕。此論是矣。但非讀書明理。恐審察之未必精。而理欲之未能辨也。

豈有舍固有之良心。而求之書冊。求之講論。以爲外鑠之學者哉。

以書冊講論爲外鑠。則孔子之好古敏求。多見多聞。眞外鑠之尤者矣。

若謂事上使衆。天下國家之事繁重難知。必須豫爲講習。不知家國天下無異理也。昔魯哀公問政孔子。對以文武之政。布在方策。言不待問也。一朝之興。各有會典。當官之職。各有掌故。時至事起。虛心延訪。實意推尋。未有不能知者。大學謂心誠求之。不中不遠。未有學養子而後嫁者。如必豫爲講習。是學養子而後嫁也。

獨忘對哀公必明乎善及擇善之語乎。大學謂未有學養子而後嫁。見誠求之不假強爲。非舉學古入官之則而廢之也。果如所云。子夏何以言學而優則仕。仕而優則學乎。漆雕開何以言吾斯之未能信。而子說之乎。則講習果不必豫乎。此子路何必讀書。然後爲學之論。而夫子斥之爲佞者也。

昔顧東橋疑經事可以理推變。事非精義不能。恐須平時講解。因舉舜不告而娶。周公大義滅親二事爲問。陽明先生答以舜周公亦止臨時以心度其輕重。並非平時豫爲講習。見古人有不告而娶。大義滅親。

者因而效法之也。蓋心之爲用萬物皆備。苟能治心無施不可。

古人有幾舜與周公。此所謂生而知之者也。正爲不能如舜周。故必取古聖賢之成法。講明而切究之。所謂學而知之也。安可援舜周一律師心自用于此見王陽明之教。祇可自爲之。而非人人可爲者也。卽以舜周論。孟子言舜明於庶物。察於人倫。言周公思兼三王。以施四事。豈毫不豫爲講習。而全憑心度者乎。又如陽明之功業。文經武緯。豈作秀才讀書時。略無所講習。而臨事猝然能之乎。恐亦徒欲伸其良知之說。而非生平踐履之實也。

伊川程子論學。謂學也者。使人求于內也。不求于外。非聖人之學也。以文爲主者。是也。學也者。使人求于本也。不求于本。而求于末。非聖人之學也。考詳略探異同者。是也。二者皆無益于吾身君子弗學。

中庸明言合內外之道。孔子言殷因於夏禮。此本也。所損益。此末也。詳略異同。是也。有內無外。是有仁無智矣。有本無末。則不能因時制宜。而禮有所不行矣。凡此皆伊川拘固之言。過高之論。而穆堂反引爲據。其實伊川亦非穆堂所取。此徒欲攻朱子講習討論。以求知之說。而借伊川之言以難之耳。羅整菴名欽。謂明心爲禪學。朱子釋明德爲虛靈不昧。豈非心乎。又曰。具衆理應萬事。豈非心乎。以心釋明德。則明明德。非明心乎。

強分心性。本後儒支離之談。自豐其蔀者也。整菴輩徒恃此爲能事耳。曷嘗于聖學有得。穆堂此論。實

足以矛盾。

彼釋氏者遺棄人倫空諸萬有施之爲教不可以脩身不可以齊家不可以治國平天下舉吾心所有者而悉昧之何明心之有使陽明之學而果如是謂之禪可矣然謂陽明之學不足以脩身齊家治國平天下雖童子知其不然也不考之實事而漫爲心性之空言以相排詆豈不悖哉

此屬公論蓋陽明鄰于生知本有自得之實特難爲衆人之法耳凡攻陽明爲異端者皆偏也

整菴與陽明同在武宗之時天下多故身爲大臣離事自全而已能抗劉瑾乎能誅宸濠乎能靖粵西之亂乎此實學與虛說之辨也若陳建輩無知妄論自郐以下矣

整菴首攻陽明凡詆陽明爲異端者皆援之爲說其實整菴立身不及陽明之萬一直不知人間有恥羞事也

發明本心說

朱子因陸子教人有養明本心之說遂以頓悟目之而其實非也陸子全集予繙閱數十過絕無頓悟二字其生平教人好舉木升川至專以循序爲主至于發明本心並非頓悟孟子論乍見孺子入井卽所以發明惻隱之心論嘵蹴之與不受卽所以發明羞惡之心不辨禮義而受萬鍾者則謂之失其本心陸子之意不過如此其所以必欲發明人之本心者蓋專以效法先覺言學則中材以下必且以資性諉爲不能惟知仁義禮智皆本心固有非由外鑠然後夫婦之愚不肖者皆可以與知可以能行而人皆可以爲

堯舜無庸自誣亦無可自棄此發明本心之教所謂不可以已也。自聖賢之學變而爲科舉之業剽竊口耳不復以身心體認陸子之書未嘗經目而道聽途說隨聲附和咸曰陸氏爲頓悟之禪學不知陸子全書具在絕無此說而循序之教則無時不然無人不然正與尙頓悟者相反學者試取陸子全書讀之則知娶寡女者不可誣以搃婦翁矣。

此辨陸子頓悟之說至明。陸子之非禪學亦至明。朱子于陸子不免深文周內固宜分別觀之。但在孟子發明本心原未嘗廢學問。卽陸子亦有讀書涵養之說。穆堂又何必盡闢聞見之知廢書冊討論之益而狃爲一偏之論耶。且使書冊可廢。卽孟子不必讀矣。陸子又安得本心之說倡以爲教耶。至于聖賢之學變而爲科舉在朱子當日集四書作傳注之日誠不及料。科舉俗學與聖賢之學原爲同牀各夢但有志爲聖賢者亦卽拔起其閒不以科舉廢也。使朱子不集四書不作傳注不以此設科舉聖賢之學未必果盛于今也。昔與諸友論時文誤人毛雲衡曰諸君知其一不知其二設不用四書文專用詩賦恐讀四書者皆少矣。孰若借此使其長與四書謀而使聖賢義理澆灌其心不猶愈于虛文浮藻耶。予深服其論之確因識于此。

### 致良知說

致良知之說昭然無可疑而至今未決者支離之俗學以謬見駁之而放蕩之門徒以末流失之也。自陽明先生倡道東南天下之士翕然從之名臣脩士不可勝計其道聽塗說起而議之者率皆誦習爛時文

舊講章以求富貴利達之鄙夫耳。間有一二脩謹之士，闔然媚世而自託于道學者，稍相辨論，不知其未嘗躬行，自無心得，不足以與于斯事。而考見其是非之所在也。羅整菴駁良知非天理，尤爲悖謬。良知之說出孟子，原無弊。整菴因欲駁陽明，遂斥良知非天理。然則孟子言愛親敬長亦非天理耶？整菴全出門戶意見之私，欲以爭勝陽明，而不知反見繙于陽明也。但專執致良知之說，必以講習討論爲支離，而專師心自用，則未免有弊耳。

韓昌黎原道謂仁與義爲定名，道與德爲虛位。楊龜山駁之曰：道固有仁義，而仁義不足以盡道。楊氏之言大謬。易傳謂立人之道曰仁與義，論道之實有就五常言者，有就四德言者。而五常四德之中，惟仁義爲尤重，故易大傳以配陰陽柔剛，而槩乎人之道。孟子之告梁惠王，亦曰仁義而已。其論士曰：居仁由義，大人之事備矣。曰已、曰備。楊氏何不併駁其未全乎？朱子語類仁義不足以盡道，游楊之意，大率多如此。蓋爲老莊之說陷溺得深，近得龜山、列子說一編，不知何故，直如此背馳。是朱子于楊氏亦議之矣。

宋儒中楊氏尤陋。此論足證其心之闇也。

古文尙書考

荀子解蔽篇，故道經曰：人心之危，道心之微，危微之幾，惟明君子而後能知之。荀子引道經，則尙書必無人心惟危，道心惟微之語。蓋荀况著書在詩書未燔之前，凡引詩書並稱詩云書云，而此獨稱道經。則秦火之前，荀子所見之尙書無危微語也。楊倞注云：今虞書有此語，而云道經者，蓋有道之經，不知漢以前。

從未嘗稱易詩書春秋爲經論語孟子所引亦無經字經解出于戴記未必爲孔子之言然通篇無經字其經解之名則漢儒所署耳孝經亦漢人鈔撮聖賢緒言爲之不然不應漢以前無一人語及之也至漢武帝始設五經博士蓋漢初尙黃老儒者慕焉因亦效道家者流各尊其所治之書爲經自稱曰經師此如龐蘊語錄惟僧人稱之而宋儒弟子之無識者亦錄其師之言名以語錄焉耳或謂十二經六經之名莊子天道天運二篇有之不知莊子外篇卽多贗文未足據也又史記所引者安國所得于壁中之真古文尙書非今所有之古文尙書朱氏彝尊嘗攷之矣觀殷本紀所引湯誥周本紀所引泰誓辭皆與今所傳古文尙書絕不相類蓋安國所得壁中者信有其書而特非今世所行之古文尙書也

疑古文尙書者其說至夥穆堂所論尤爲有據但古書同辭者甚多荀子偶引道經未引尙書豈得據其所引轉斥尙書之僞史記引湯誓泰誓與今所傳不同是誠可疑但史記引書卽今文所有者亦多不同如平章作便章之類恐皆係史遷點竄而然如謂別有孔壁真本古文漢以來無秦火之失何以傳尙書者不傳其真反傳其僞者耶總之古文行世已久格言至論多出其中與其過而疑之不如過而信之也



# 平書卷七

文藝篇上

此篇自經史子集之文無所不論惟詩有榆樓詩話故不及焉。

十三經之文無不鍊者甘使人讀之不解而不肯易其言文之體應如是亦所以重道也周秦諸子皆然漢賦及他文體莫不然賈生相如子長子雲孟堅其最著也東漢以後文體漸卑非鍊之過乃不鍊之過也六朝文雖卑句法猶鍊特其氣不如西漢之雄傑耳至韓柳出乃一震其雄傑之氣而句法之鍊仍多得于漢人。

幼讀左傳楚伐隨軍于漢淮之間桓八年疑其與淮何涉後乃知隨州大洪山縣亘數百里陽爲漢水陰爲桐柏淮水所出蓋軍于大洪也。

池北偶談劉知幾曰敍事之工以簡爲主左氏記晉平公飲酒幾三四十言檀弓只以十七字盡之云子卯不樂知悼子在堂斯其爲子卯也大矣語益簡味益長可爲文章之法。

左傳趙穿曰我侵崇秦急崇必救之後人改本爲崇急秦必救之只倒一字便有古今之別。

古人用字上下不嫌同辭如左傳文十四年周公將與王孫蘇訟于晉王叛王孫蘇之類是也或謂之奇或謂之謬皆枉。

又定公九年東郭書讓登本先登而謂之讓亦與後人用字不同處。

公羊莊公十三年曹子手劍而從之管子進曰君何求乎曹子曰城壞壓境君不圖與管子曰然則君將何求曹子曰願請汝陽之田管子顧曰君許諾一字不著莊公桓公而莊公之怯懦桓公之卒愕如見公穀敍事勝于左傳處不一而足。

左傳哀二十四年是讎言也注讎過也疏讎僞不信也讎音衛。

楊升菴曰左傳公若謂圉人曰爾欲吳王我乎三國志欲曹爽我乎宋人奏議云是欲劉豫我也皆祖左傳句法。

晉語夷吾私于公子摶曰君實有郡縣郡縣之名始此。

琴操載齊思革子石文子叔慈子往楚事與羊角哀左伯桃事酷類大抵秦漢記載多一事而異名者據管子管仲先鮑叔死據說苑鮑叔先管仲死諸子之說牴牾多如此。

管子小匡篇樸野而不慝其秀才之能爲士者則足賴也秀才之名始見于此楊升菴謂始于趙武靈王論胡服俗辟民賊是吳越無秀才語不知管已先之矣升菴又謂再見于賈誼傳六朝遂以爲取士之科云。

楊用脩曰古文語多倒管子曰耶言伐莒者漢書中行說曰必我也爲漢患者按惟倒爲峭惟峭爲妙蘇子由古今家誠序引老子慈故能勇儉故能廣今老子無儉故能廣語可與孟子食之以時用之以禮。

財不可勝用相參

老子其安易持其未兆易謀此類語乃五經中精語

楊用脩曰文子引老子人生而靜天之性也感物而動性之欲也漢儒取入禮記遂爲經矣

老子謂大道廢有仁義六親不和有孝慈國家昏亂有忠臣按無惡則善不顯勢也然有仁義大道不廢矣有孝慈六親可和矣有忠臣國家可不昏亂矣是惟恐仁義孝慈忠臣之不多也老子之意則欲並仁義孝慈忠臣而去之惡疾廢藥惡飢廢食其不達亦甚矣

老子謂絕聖去智絕仁去義絕巧去利按不但聖智仁義不可去卽巧利亦不可去也巧利而導之于正安往非聖智仁義哉

老莊之意欲天下歸于渾噩一成爲榛榛狉狉之世而後謂之道德不但理有所不可勢亦有所不能矣何其不達也

墨子令之俯則俯令之仰則仰是似影也處則靜呼則應是似響也按此譬人臣之容悅者鄉原鄙夫墨子之所不爲也

列子墨之徒謂楊之徒曰以子之言問老聃關尹則子言當矣以吾之言問大禹墨翟則吾言當矣可見二氏之所託矣

墨之託禹昭其儉也然禹非飲食而致孝乎鬼神而墨主于薄葬夫儉美德也少差而且流于墨況其他

乎。

傳謂史角往魯始有墨翟之學。墨之爲墨亦舊矣哉。

孟子爲後世文章之祖。上孟如五嶽高明廣大氣象萬千。中孟如瀟湘武夷曲折入勝。下孟如蠶叢鳥道。險絕幽深。唐宋八家無不取徑于此。而各成其面目。人之嗜好有不可解者。李泰伯不愛孟子。歐陽公不愛杜詩。王半山不愛李詩。皆不可爲訓。

列子載楊之徒攻爲仁義者。有曰。昔有昆弟三人遊齊魯之間。同師而學仁義之道。其父問之。伯曰。仁義使我愛身而後名。仲曰。仁義使我殺身以成名。叔曰。仁義使我名身並全。彼三術相反而同出于儒。按此蓋譏儒之多歧也。夫愛身而後名者。仁義之明哲保身也。殺身以成名者。仁義之致命遂志也。名身並全者。仁義之得位乘時也。窮達皆宜。夭壽不貳。此仁義所以爲美也。今各執一端以窮之。徒見其誠淫邪遁而已矣。

列子說符篇。鮑氏子對田氏曰。天地萬物與我並生者也。類無貴賤。徒以小大智力而相制。人取可食者而食之。豈天本爲人生之。是蚊蚋噯膚。虎狼食肉。豈天本爲蚊蚋生人。虎狼生肉者哉。按此已開佛氏戒殺之漸。謂類無貴賤。是其味也。非先王中正之道。然可以警暴殄天物者。

列子薛譚學謳于秦青。未窮青之技。辭歸。青餞之。撫節悲歌。聲振林木。響遏行雲。譚乃請還卒業。按此與成連海上伯牙。謂先生將移我情者。同一深遠矣。

列子楊朱曰三皇之事若存若亡五帝之事若覺若夢三王之事或隱或顯億不識一當身之事或見或聞萬不識一目前之事或存或廢千不識一

莊子言道似極元妙其所歎者曰誠曰敬便惝恍而無著持

莊子逍遙齊物皆欲保身于亂世亦易道之一端所謂儉德辟亂不可榮以祿也然爲善無近名爲惡無近刑其去聖言遠哉

莊子駢拇等篇所論麤淺必其徒依託爲之然莊子本視仁義在性外直以爲收名之具此其所蔽也莊子之道善一身而有餘善一世而不足

戰國之亂亟矣孟子正襟之談也屈子垂涕之道也莊子長歌之哀也

莊子非真能齊物者也特憤世之亂忍己之窮而託爲高曠以自娛耳其曰知其無可奈何而安之若命底蘊具見矣聖賢之安命豈因無可奈何哉

莊子言靜而不言敬言無而不言有言道德而不言仁義于聖學半得半失至其刻畫人情雕餽物理如大禹鑄鼎使神姦畢露而自不敢近則以爲六經之羽翼可也蒿目世亂長歌當哀知不能有得無失則得失一視知不能有生無死則生死齊觀一言以蔽之曰知其無可奈何而安之若命謂非古之傷心人哉讀者徒震于洸洋自恣之辭譽之則過其實毀之則損其真于漆園之旨皆夢夢也余每置其本意而從斷章取義之例析取其精言足以發聖經節取其庸言足以透世情略取其瑣言足以括物象縱觀其

放言足以徹九霄而達九淵斷爲從古第一奇文。

莊子人閒世櫟社大木二章全爲己身寫照。莊隱于漆園吏正所謂直寄焉以爲不知己者詬病也。其子接輿之歌曰方今之世僅免刑焉亦可諒莊子之心矣。

莊子德充符自其異者視之肝膽楚越也。自其同者視之萬物皆一也。蘇子瞻赤壁賦自其變者而觀之天地曾不能以一瞬。自其不變者而觀之則物與我皆無盡也。正用莊子。

莊子天地篇至德之世端正而不知以爲義相愛而不知以爲仁實而不知以爲忠當而不知以爲信蠢動而相使不以爲賜是故行而無迹事而無傳可與禮運之言相參。

莊子徐無鬼載管仲薦隰朋于齊桓公曰以德分人謂之聖以財分人謂之賢以賢臨人未有得人者也。以賢下人未有不得人者也。其于國有不聞也。其于家有不見也。與孟子分人以財謂之惠教人以善謂之忠爲天下得人者謂之仁略類而直迂醇駁大小迥異。

莊子徐無鬼嗟乎我悲人之自喪者吾又悲夫悲人者吾又悲夫悲人之悲者其後而日遠矣杜牧之阿房宮賦秦人不暇自哀而後人哀之後人哀之而不鑒之是使後人復哀後人也機杼實本莊子。

莊子徐無鬼某願有喙三尺楊用脩曰鳥喙長則不能鳴喙三尺蓋不欲有言也按莊子上文謂不言之言下文謂不言之辯楊說甚尤向俱作能言解呂東萊博議亦作能言引用均悞。

唐書陸餘慶傳善論事而短于判人嘲之曰說事則喙長三尺判事則手重五斤喙長說作能言舊矣。

蘇長公答印直詩欲吐狂言喙三尺怕君嗔我卻須吞亦作欲言用

莊子夫揭竿累趣灌濱守鯢鮒其于得大魚難矣飾小說以干縣令其于大達亦遠矣與說苑載子賤未至單父冠蓋迎之者交接于道子賤曰車驅之車驅之陽晝之所謂陽鱗者至矣可以類觀莊子胸中實有所得其徒誦之曰其書雖瓊瑋而連犿無傷也其辭雖參差而諷詭可觀彼其充實不可以已按惟其內也充實不可以已斯其外也瓊瑋連犿參差而諷詭內不足而求工于外烏可以言文莊子佝僂丈人承蜩古今對禮內則庶羞有爵鷄蜩范荀子致仕篇耀蟬者務在明其火振其樹楊倞注南方人照蟬取而食之承蟬亦供食用耳

趙忠毅南閑居擇言論語之文和平冲雅如楚狂鳳兮之歌莊子所載乃其全文而論語若迷陽迷陽等語斷不可溷入論語中知此則知文體矣

莊子薄仁義譏孔子或者激于當時之假仁義以濟其私者而然亦其徒依託者多不定出莊子之手要之不可爲訓必莊子先有此意其徒乃從而甚之所謂父報仇子行劫也莫如斷章取義此讀書之良法亦不獨莊子爲然

莊子似不近人情卻極近人情似不達時務卻極達時務似不精物理卻極精物理不善讀之則談空說渺流禍無窮善讀之則指事類情爲益匪淺莊子有可解者有不可解者善讀者莫如取其可解置其不可解爲之注者必舉其不可解者強爲之解

非解人也。

讀莊子與讀國策相似。須將身置在書外。論其是非。亦不獨二書爲然。

莊子載漢陰丈人譏子貢事。必如所云。凡聖人一切利用之制。皆可以爲機事屏而不用。而人之生也難矣。老子亦云。剖斗折衡而天下治。皆徒逞其口辯而不顧事理之安者也。昔人謂爲筐篋中物。不可揚于王庭。此類累之也。

莊子胠篋篇爲之仁義以矯之。則並與爲仁義而竊之。按仁義順人之性。非矯也。竊仁義者。終非仁義。可因其竊。並罪仁義哉。以盜而責其主人。烏乎可。

上語下曰。臚。莊子大儒臚傳。故今殿試唱名曰傳臚。

莊子雖于聖學有別。而得儉德辟難之一端。崔浩不知此。斥爲矯誣不情。卒以知進而不知退。妄言觸禍。自致族刑。不亦宜乎。

楊升菴曰。莊子謂各有儀則之謂性。卽詩烝民之旨。按此語惜不令孟子見之。

或曰。書只須十三經耳。諸子盡可燒也。曰。其安易持。其未兆易謀。子之愛親命也。不可解于心臣之事君。義也。無所逃于天地之間。如此數言何如。曰。粹語也。曰。此卽老莊之言也。果可燒乎。昔人謂知屋漏者在宇下。知經誤者在諸子。吾未見其可廢也。

顧亭林毛西河每鄙薄莊子。若其言無一可取者。夫莊之不合于道者。可一覽知之。其他之精言實與十

三經相爲出入。而其語句爲史記漢書及秦漢以來文人引用不勝枚舉。卽周程張朱號爲理學論文最刻而明引莊子及暗襲莊子之意以自爲說者亦不一而足。是莊子之不可廢已如油入麪決難搜剔。雖顧毛二氏所作之書有沿襲莊子而不覺者乃欲全斥之多見其不知量矣。

顧氏屢謂引言不當用莊子諸書而所著日知錄開端一條卽引墨子周之春秋燕之春秋宋之春秋齊之春秋數語豈非不能自顧其睫者乎。又云周燕齊宋之史非必皆春秋而云春秋因魯史之名以名之也此亦不然當時晉羊舌肸習于春秋楚申叔時教之春秋又豈盡屬借魯史以名之邪恐當時列國之史多名春秋也。

方朴山曰名達于天子則統曰春秋名從乎主人則別曰乘曰櫓杌孔沖遠賈公彥說皆如此。

楊升菴曰邵康節謂莊子庖人雖不治庖尸祝不越樽俎而代之言君子之思不出其位楊龜山謂逍遙遊一篇子思所謂無入而不自得養生主一篇孟子所謂行其所無事能以此意讀莊子則善矣。

孔叢子平原君謂公孫龍曰公無復與孔子高辨事其人理勝于辭公辭勝于理按千古立言之體盡于此矣理勝于辭者聖辭勝于理者困然有理必有絕妙好辭以達之此則貴乎能文辭勝終歸于理也。

韓非子載文王不予膠鬲玉版以待費仲爲惡賢者之得志按此戰國之陰謀而乃以誣聖人也。韓非子人主以二目視一國一國以萬目視人主又曰吏者民之本綱也聖人治吏不治民又曰漁者持鱠婦人拾蠶利之所在皆爲貢諸又曰必恃自直之箭百世無矢必恃自圓之木千世無輪皆名言也。

韓非子宋人刻玉爲楮葉三年而成雜之楮葉不辨列子曰使天地三年而成一葉物之有葉者鮮矣呂氏春秋先王之所以治亂安危也注亂者治之危者安之按安危猶持危之意荀子後王者天下之君也舍後王而道上古譬猶舍己之君而事人之君按況之言如此李斯師心蔑古誠哉其師有以致之矣

澗泉日記神宗論孫武書愛其文辭意指王安石曰孫武談兵言理而不言事所以文約而該者博上論及韓信安石曰信但用孫武一兩言卽能成功名上曰如韓信自是奇才因諸將問引書應之非因兵書而能及此也按安石泥古敗事卽此論已見之

國之有史也皆所以爲實錄也戰國策亦據其事直書之而是非自見耳讀者每苛論之何其不達也國策非一人所作其記事多矛盾亦頗有漢初人筆如記高漸離擊秦皇之類是也

國策蘇代說燕王曰夫無謀人之心而令人疑之殆有謀人之心而令人知之拙謀未成而聞于外則危史記載爲子貢說越句踐語疑本係代之言史記附會爲子貢也

左傳考叔以小人有母動莊公國策觸鬱以幼子舒祺動太后同一機袖但左傳蒼勁國策婉妙各極其勝王氏崇詢曰雞口牛後古本雞戶牛後國策辛義曰戶雞中之主牛後牛子也俗寫誤耳按湧幢小品云古語庸爲雞口毋爲牛後口後叶韻非誤也未知孰是

丹鉛總錄詳載禹碑源委宋嘉定中何政子一模刻于嶽麓書院其文云承帝曰嗟翼輔佐卿洲渚與登鳥獸之門參身淇流而明發爾興久旅忘家宿嶽麓庭智營形折心罔弗辰往求平定華岳泰衡宗疏事裒熒餘申禋鬱塞昏徒南瀆衍亨永制食備萬國其凝竄舞永奔按此恐係後人摩擬之文趙雲崧曾詳辯之

博物志載東方朔飲不死酒帝欲殺之朔乃曰殺朔若死此爲不驗以其有驗殺亦不死語從戰國策闇者食不死藥事化出

黃長睿曰諸騷皆楚語作楚聲紀楚地名楚物些只羌諺塞粉楚語也悲壯頓挫或韻或否楚聲也沅澧脩門夏首楚地也蘭茝荃蘅楚物也

甲午春館吳淪齋學使處淪齋于安陸試院偶論及楚辭纵秋蘭以爲佩謂爲澤蘭始可佩非今蘭蕙之蘭其言甚辯幕友胡光伯嘲笑曰不知集芙蓉以爲裳又係何物淪齋笑而不答蓋亦悟矣芙蓉豈可爲裳秋蘭又豈可爲佩皆極喻志潔行芳之意使視爲眞則以芰衣蓉裳而處薑房荷屋屈子豈生之水仙者乎凡讀楚辭強半當如是觀

木蘭之墜露如何可飲秋菊之落英如何可餐彼紛紛辯菊之落與不落及以落訓始者非皆癡人說夢邪人知莊子多寓言不知屈子寓言尤夥

賈長沙過秦論上後一段機袖本國策

顧黃公曰隋改梁蕭安縣爲木蘭縣皆因木得名也木蘭縣今黃陂縣是古多木蘭故名一說離騷朝參  
毗之木蘭卽此毗陂同今土人以木蘭女附會可笑

賈誼新書鬻子曰聖王在上位則天下不死軍兵之事民免于一死而得一生矣聖王在上位而民無凍餒民免于二死而得二生矣聖王在上位民無天譴之誅民免于三死而得三生矣聖王在上位則民無厲疾民免于四死而得四生矣按民生有道之世無往而不得生民生無道之世無往而不得死吾觀鬻子之言而幸身居太平也猶望長享太平也

漢高祖入關告諭悱惻真純正大高古實與湯誓泰誓相表裏特句調不同耳惟不因襲愈高四百年之帝業基于此卽文章亦基于此若自爲之真天授矣代言者誰與其蕭何張良抑隨何陸賈之倫與說苑貞良而亡先人餘殃猖蹶而活先人餘烈

司馬遷字子長漢書本傳失載揚子法言始見之

太史公點竇尚書論語左傳諸書皆不及原文自運則奇奧湏洞前無古人乃知文章須空所依傍史記于戰國策每直錄原文以其文本至妙無可增損也方望溪欲抑國策轉謂纂國策者從史記抄出恐不然望溪中宋儒深痼之病愛人加諸膝惡人墜諸淵議論大率如此

古今對辨史記載莊生陷朱公子事爲誣深有理包氏譏曰史漢傳名字志與表多不相應而史疏愈甚平原君之子使匈奴中匈奴無禮罵匈奴而死太

史公自言與余善者初亦不記其名其他疏闕又何怪邪

文勝實則史

史體應紀實而史記多借題寫意其文之高奇在此其不足爲信史亦在此然左氏浮夸自古已然故曰

這音彥迎也正字通周禮掌訢主迎訢古作這毛晃曰凡稱此爲者箇俗改用這字這乃迎也按史記孟

嘗君傳齊湣王不自得以其這孟嘗君孟嘗君至正迎字之義

池北偶談鹿菴先生曰前漢列傳多少好樣度于後插一銘詞篇篇是箇碑表墓誌

漢書制勝處尤在諸贊至諸紀傳點竄史記有遜之者亦有勝之者要之史記之奇宕變化出鬼入神非班所及也

漢書尹翁歸傳結云由是世稱田延年爲知人王溫舒傳結云溫舒死家累千金言外蒼茫不盡尤據勝場

漢書刪潤史記實有不及處如史記外戚竇后傳敍后初見弟廣國持之而泣泣涕交橫下侍御左右皆伏地泣助皇后悲哀形容絕倒漢書則云后持之而泣侍御左右皆悲此在史筆刪煩所謂辭尙體要然以傳神寫照筆外有筆則失之遠矣

楊升菴曰漢書白頭如新傾蓋如故說苑作白頭而新傾蓋而故而如古字通然作而字解尤有意味

後漢書鄧禹傳光武使持節拜禹爲大司徒詔功效尤著下卽接云百姓不親五品不訓汝作司徒敬敷

五教在寬直寫尙書數句並不用書曰最爲大雅若點竄便不妙矣用古有此一體可爲法式。

後漢書董仲綬智爲儒梟

韓非司馬相如揚子雲俱以口吃善著書亦天之附其翼者兩其足也。

漢賦雖體近離騷而實導源雅頌推波助瀾揚詡發皇包羅萬有自是炎劉一種極盛文字左思三都差堪嗣響自後無繼之者揚子雲所謂雕蟲小技壯夫不爲正後之壯夫所不能爲者也。

三國蜀志秦宓與王商書蜀本無文學文翁遺相如東受七經還教吏民于是蜀學比于齊魯故地理志曰文翁倡其教相如爲之師按此則相如之文實亦原本七經人徒賞其奇麗而不揆其本根亦僥矣。馬良與孔明書曰聞雒城已拔此天祚也尊兄應期贊世配業光國魄兆見矣。

周櫟園書影謂人譏揚子雲僭經夫聖人之言偶成一體何妨效法左傳本之尙書四言本之三百後人文因前人規模者何限卽如尊經翼聖莫如朱子而綱目全擬春秋孔子藉魯史以褒貶所憑者天子之權耳至無所憑藉且以進退天子之爵號由此言之晦菴僭經之罪浮於子雲多矣顧於晦菴則尊之子雲則斥之乎又謂潛居錄云揚子雲恬澹寡營不競時名以賣文自贍文不虛美人多惡之及卒其怨家取法言益之曰周公以來未有漢公之懿也云云此說與其疑也庸信美新可知矣馮元成以美新爲劉棻作又謂蜀秦宓與王商書如揚子雲潛心著述有補於世泥蟠不滓行參聖師於司馬相如云雖有王孫之累猶孔子大齊桓之伯云云使美新果出於子雲宓亦當云雖有美新之累矣何稱行參聖師耶焦

澹園爲子雲辨證甚明似可引此爲助又謂子雲投閣之事宋孫明復曰太玄一書乃明天人始終之理君臣上下之分蓋疾莽而作也上符命投閣係谷子雲事按合此數則可以破莽大夫之謗矣西京雜記揚子雲曰飛書馳檄用枚皋高文典冊用相如按文體能如此各用所長則可兼收並蓄而一切是丹非素之見不存矣

楊子旣謂高文典冊用相如又謂相如文麗用寡一爲事言之一爲道言之馬伏波與楊廣書及今成計殊尙善也過是欲少味矣語澹而永

李陵答蘇武書自是強辭奪理然其文則激昂慨慷不減子長大抵陵與遷善故筆墨蹊徑如一耳蘇子瞻乃謂齊梁小兒爲之夫齊梁名家猶不能爲況小兒乎子瞻非不知文者特一時意見耳宋人意見最大其所善揚之九天所惡抑之九淵而究非其實也

諸葛武侯後出師表蜀志不載文選亦無裴松之據漢晉春秋以爲此文出張儼池默記近人多疑之者然忠肝披豁與其疑也庸信

徐幹未仕于魏當屬漢人先賢行狀稱幹篤行體道不耽世業所著中論多可取曾子固亦極推之陳琳反覆小人也旣爲紹草檄罵操復爲操草檄罵權且其文筆實累綴不工

曹丕愛文學之士典論猶稱孔融或亦隱恨乃父之殘與文章可覘人福壽曹子桓書啓非不小有清致然語言瑣屑氣象衰蕪纂漢卽天不應爾耶

陸士衡弔蔡邕文故尼父之惠訓智必愚而後賢大約用智必守之以愚然士衡正苦于不能愚者也所謂人患才少子更患其多豈非責人斯無難自責厥惟艱哉

嵇康絕交書吾昔讀書得并介之人并介猶言兼善獨善也二字甚奇

士衡文賦序文每自屬文尤見其情恆患意不稱物文不逮意蓋非知之難能行之難也故作文賦以述先士之盛藻因論作文之利害所由按文賦曲盡文心之妙士衡自作頗不逮序真不欺人語也然有此賦一篇已足以傳士衡餘作鱗爪觀可也嗚呼自秦漢以來意稱物文逮意者有幾人哉

李興代劉宏祭諸葛武侯文匪皋則伊奚比管晏當時已極推崇不待少陵始云伯仲之間見伊呂也

王隱

晉書興密之子一名安

晉書卞壘對阮孚曰諸君以道德風流相尚執鄙吝者非壘而誰與樂廣名教自有樂地之語皆中流砥柱也

晉傅元著傅子原本久佚今武英殿聚珍本所刊凡四十八條係從永樂大典纂成者言頗純正其仁論篇德比于上則知恥欲比于下則知足二語尤精

傅子矯遠篇桀信其佞臣推侈以殺其正臣關龍逢而夏以亡紂信其佞臣惡來以剖其正臣王子比干而殷以亡按推侈之名僅見于此

晉庾峻曰秦塞斯路利出一官雖有處士之名而無爵列于朝者商君謂之六蝎韓非謂之五蠹按此議

出而天下之爲儒者難矣。然儒中邪僻貪婪者亦多。今謂之蝗蟲。其蠍蟲之流與。續晉陽秋。謝安優游山水。以敷文析理自娛。

漢書蒯通傳。通論戰國時說士權變。亦自序其說。凡八十一篇。號曰雋永。按此爲自訂文集之始。惜後世莫覩其書耳。

隋志列總集一門。謂建安之後。衆集滋廣。晉摯虞于是條貫論之。謂之流別。選事自此權輿。杜預集古人文章之善者。曰善文。此選本之始。在昭明文選前。

昭明世稱其賢。然以厭得罪。亦閻識也。即其所著文選。于漢賈董。治安天人諸策。爲三代後文章巨觀。者不錄。所取多浮浪小文。使其爲君。取舍之間。必慎矣。視河間獻王之尊崇經術者。豈可同日語哉。世傳昭明不選蘭亭序。因絲竹管弦犯複。又有謂因天朗氣清似秋。非春者。其實古文中。此類語句甚多。不足病也。惟其文作楚囚對泣之況。殊煞風景。一生死齊彭殤。固屬放蕩。而必計較生死彭殤。更愚矣。逸少嘗慕激于王述。未忘生死。卽其未忘富貴之癥結也。蘭亭考絲竹管弦。乃用漢書語。固不足病也。

南史。韋叡。字懷文。京兆杜陵人。世爲三輔著姓。事繼母以孝聞。梁軍發郢。留守郢州。初。郢城之拒守也。男女垂十萬。閉壘經年。疾疫死者十七八。積屍牀下。生者寢處其上。比屋盈滿。叡料簡隱卹。咸爲營理。百姓賴之。攻魏小峴。軍衆遲疑。叡指其節曰。朝廷授此。非以爲飾。韋叡之法。不可犯也。乃進兵。魏軍敗。急攻之。城拔。叡素羸。每戰以板輿自載。督勵衆軍。晝接賓客。夜算軍書。三更起。張燈達曙。撫循其衆。常如不及。故

投募之士爭歸之所至頓舍脩立館宇藩籬墉壁皆應準繩合肥既平有詔班師去魏軍近懼爲所躡叢悉遣輜重居前身乘小輿殿後魏人服叢威名望之不敢敵全軍而還詔救昌義之于鍾離徑陰陵大澤過澗谷輒飛橋以濟師人畏魏軍盛多勸叢緩行叢曰鍾離今鑿穴而處負戶而汲車馳卒奔猶恐其後而况緩乎旬日而至魏將楊大眼將萬餘來戰大眼以勇冠三軍所向皆靡叢結車爲陣大眼聚騎圍之叢以彊弩二千一時俱發洞甲穿中殺傷者衆矢貫大眼右臂亡魂而走中山王元英自率衆來戰叢遣小船載草灌膏焚橋風怒火盛軍人奮勇呼聲動天地無不一以當百魏人大潰元英遁走義之且悲且喜但叫曰更生更生以功進爵爲侯會救馬仙琕至安陸增築城二丈餘更開大壘起高樓衆頗譏其示弱叢曰不然爲將當有怯時是時元英追仙琕聞叢至乃退叢于故舊無所惜居朝廷恂恂未嘗忤視武帝甚禮敬之性慈愛撫孤兄子過于己子歷官所得祿仕皆散之親故家無餘財雖老暇日猶課諸兒以學弟三子稜尤明經史世稱其洽聞叢所發擿稜猶弗之逮武帝之銳意釋氏天下咸從風而化叢自以信受素薄位居大臣不欲與衆俯仰所行略如他日卒于家年七十九謚曰嚴叢雅有曠世之度涖人以愛惠爲本所居必有政績將兵仁愛士卒營幕未立終不肯舍井竈未成亦不先食被服必于儒者雖臨陣交鋒常緩服乘輿執竹如意以麾進止初昌義之甚德叢請曹景宗與叢會因設錢二十萬官賭之景宗擲得雉叢徐擲得盧遽取一子反之曰異事遂作塞景宗與羣帥爭先啓之捷叢獨居後其不尙勝率多如是世尤以此賢之

吾觀史所載。叡之子放。孫粲。放弟正。正子載。鼎。正弟稜。稜弟諳。俱以功名經業世。其家而孫粲起兵勤王。與侯景戰死。謚爲忠貞。以節義著。鼎字超盛。通曉經史。明陰陽逆刺。尤善相術。先識陳武帝。望氣知其當王。後識隋文帝。知其貴。則天下一家。何其神也。迄唐之韋氏。簪纓赫奕。率多叡之後裔。

曹景宗以武將賦競病。然正不獨能詩。梁書本傳。景宗性躁動。出行常欲褰車帷幔。左右輒諫。景宗謂所親曰。我昔在鄉里。騎快馬如龍。與年少輩數十騎。拓弓弦作霹靂聲。箭如餓鴟叫。平澤中逐麋數肋射之。渴飲其血。饑食其胃。甜如甘露漿。覺耳後風生。鼻頭出火。今來揚州作貴人。動轉不得。路行開車幔。小人輒言不可。閉置車中。如三日新婦。遭此邑邑。使人無氣。觀此是何意態。文亦雄傑殊勝。

文中子謂謝朓。淺人也。其文捷。按不淺不捷。後人則以捷爲貴矣。

金樓子六卷。梁孝元帝撰。卽湘東王繹也。所論醇疵參半。其中頗重孝行。然繹救父逗遛致臺城之辱。實不孝之尤者。空言亦誰欺哉。摘錄數則。以備考核。亦有與他書出入者。顏延年云。大喜蕩心。微抑則定。甚怒傾性。小忍則歇。伯樂教其所憎者相千里馬。其所愛者相駒馬。瞞金石者難爲力。摧枯朽者易爲功。居得其勢也。秋早寒則冬必緩。春雨多則夏必旱。天地不能兩。而况于人乎。一兔走街。萬夫爭之。由未定也。積免滿市。過者不顧。非不欲免。分已定矣。雖鄙人不爭。故治國存乎定分而已。失火而取水于海。海水雖多。火必不滅矣。遠水不可救近火也。

呂覽云。衣人在寒。食人在饑。陳思王云。投虎千金。不如一豚。肩寒者不思尺璧。而思襪衣。夫以衆勇無

所畏乎孟賁矣。以衆力無所畏乎烏獲矣。以衆視無所畏乎離婁矣。以衆智無所畏乎堯舜矣。此君人者之大寶也。狂者東走逐者亦東走溺者入水救者亦入水事雖同而心異也。

又云女國有橫一作潢池水婦人入浴出則孕若生男子三年卽死鯨鯢一名海鱠穴居海底入穴則水溢爲潮來出穴則水入爲潮退出入有節故潮有期扶南國今衆香皆共一木根是旃檀節是沈香花是雞舌葉是霍香膠是薰陸東平思王生埋所寵幸者號呼之聲後數十年猶有聞者孔子游山使子路取水逢虎于水與戰攬尾得之內于懷中取水還問孔子曰上士殺虎如之何子曰上士殺虎持虎頭中士殺虎如之何子曰中士殺虎持虎耳下士殺虎如之何子曰下士殺虎捉虎尾子路出尾棄之復懷盤石曰夫子知虎在水而使我取水是欲殺我也乃欲殺夫子問上士殺人如之何曰用筆端中士殺人如之何曰用語言下士殺人如之何曰用盤石子路乃棄盤石而去按此蓋附會子路之勇孔子知之而失之誕者也金樓之言此最不經

北史高允表請制大郡立博士二人助教四人學生一百人次郡立博士二人助教二人學生八十人中郡立博士一人助教二人學生六十人下郡立博士一人助教一人學生四十人其博士取博聞經典履行忠清堪爲人師者年限四十以上助教亦同若道業夙成才任教授不拘年齒學生取郡中清望人行脩謹堪束脩名教者先盡高門次及中等按此郡縣設學之始甚矣允之有功于名教也

顏氏家訓人生小幼精神專利長成已後思慮散逸固須早教勿失機也吾七歲時誦靈光殿賦至于今

日十年一理猶不遺忘二十之外所誦經書一月廢置便荒蕪矣然人有坎壈失于盛年猶當晚學不可自棄孔子之五十以學易曾子七十乃學名聞天下荀卿五十始來遊學易論語皇甫謐二十始授孝經論語皆成大儒幼而學者如日出之光老而學者秉燭夜行按此論最切惟曾子七十乃學一言似傳聞之訛陸放翁亦云曾子七十文學乃就予曾辨之經學質疑錄

隋書李諤傳魏之三祖更尙文辭忽君人之大道好雕蟲之小藝下之從上有同影響競逞文華遂成風俗江左齊梁其弊彌甚貴賤賢愚唯務吟咏遂復離理存異尋虛逐微競一韻之奇爭一字之巧連篇累牘不出月露之形積案盈箱惟是風雲之狀世俗以此相高朝廷據茲擢士祿利之路既開愛尙之情愈篤于是閭里童昏貴遊總弁未窺六甲先製五言至如羲皇舜禹之典伊傅周孔之說不復關心何嘗入耳以傲誕爲清虛以緣情爲勳績指儒素爲古拙用詞賦爲君子故文筆日繁其政日亂良由棄大聖之軌模構無用以爲用也按士恢此書可謂切中時弊

唐書薛登傳煬帝始置進士等科後生復相馳競赴速趨時緝綴小文名曰策學不指實爲本而浮虛爲貴按以此隱僻考人勢必至此策之名始于賈長沙董江都繼之如唐之劉蕡宋之蘇軾其最著也要皆通達治體究切時務之言沈約之徒乃有射策之說專取隱僻小數以誇博洽實如射覆之戲術耳卽其工者只可言考不可言策于時政究何所補後世之策乃驅天下于無策者也與其以張華沈約律天下士何如得賈董劉蘇之才哉使賈董劉蘇而射後世之策我知其無幸矣

新唐書劉子元傳。尙書鄭惟忠嘗問自古文士多史才少何耶。子元曰。史有三長才學識。世罕兼之。故史才少。夫有學無才。猶愚賈採金。不能貨殖。有才無學。猶巧匠無楩柟斧斤。不能成室。善惡必書。使驕君賊臣知懼。此爲無可加者。時以爲篤論。按才學識三者。尤重在識。識尤在通事理。達時務。至平至允。至明至公。不然。且有以鐵爲金。而棄楩柟如樗櫟者矣。

池北偶談。寇萊公準作相。諸司公移諱其名。改爲准。至今相沿。然求古錄。載五代石刻。已用准字。唐韻二字並收。按準准二字古本通用。文移之易準爲准。或以寇故耳。

漢文固稱極盛。然自賈傅、晁董、史遷、劉向、班掾諸公。雖杳引經傳。必有透快之筆。動人正孔子所謂辭達之義也。東漢以下。迄于唐初。文筆每犯不快之弊。未可以先儒醇實之說彌縫其失也。其他浮藻更無論矣。故必昌黎出而始豁然軒天地。浩乎沛古今。子厚配之。歐曾蘇王繼之。他美固多。總不離快之一言也。韓柳以前。快者其陸宣公乎。故韓蘇多取徑于陸。或云太快。則少溫厚之氣。不知溫厚亦必以快出之也。樊遲問仁。子曰。愛人。孝經先之。以博愛。而民不遺其親。昌黎本此。言博愛之謂仁。最確。不知程伊川何以又言便以博愛爲仁。則不可。宋儒支離多如此類。朱紫陽作仁說。千歧萬轉。究不外博愛之旨。又何也。獨無兼愛之慮耶。博愛與兼愛。亦大有辨。博愛有差等。兼愛無差等。

史記禮書。連用五爲之句法。韓昌黎原道本之。連用十七爲之句法。而參差轉換。更極意態。大抵古人行文。亦必有本而能者爲之。則變換以自用其才。斯爲善耳。

陸宣公論兩河及淮西利害狀。夫投膠以變濁不如澄其源而濁自變之愈也。揚湯以止沸不如絕其薪也。機軸相同至蘇家相喻乃極其妙。

堯舜傳賢禹傳子孟子論天道昌黎論人事二者之言相足。

進學解昌黎用六朝體結云是所謂詰匠氏之不以杙爲楹而訾醫師以昌陽引年欲進其豨苓也奇宕

古脫乃其本色文字。

爲裴相公讓官表與宣公相近亦韓文中變體也。

天竟如何命竟如何乃昌黎上崔考功書語。

釋言市有虎聽者庸也曾參殺人以愛惑聰也巷伯之傷亂世是逢也閒以韻語妙。

諱辨明確之至日知錄歷引當時諱滸勢秉機者謂退之所言未爲定論故舊史以韓愈爲李賀作諱辨爲紕繆學如退之固無如好爲宦官宮妾之忠孝者何矣。

送高閑上人序爲旭有道利害必明無遺錙銖情炎于中利欲鬪進有得有喪勃然不釋其意蓋爲寂滅者下砭然如此立說恐未足闡釋氏之口。

楊子法言貌則人心則獸昌黎送鄭尚書序好則人怒則獸。

雞牕剩言昔郭汾陽治第謂工人曰好築牆勿令不牢築者對曰數十年來京師達官貴人一皆某所築。

今某死、某亡、某敗、某絕。人自改換、牆固無恙。公聞之、惕然請老。恐係竊取昌黎王承福傳而爲之說者。然亦足以振聾醒寐。

昌黎答崔立之書。末段亦倣曹子建與楊德祖書。但其筆力豪邁。透出其上。所謂起八代之衰者。觀此尤可得其意境。大約昌黎陶冶百家。自用其才。真集古文之大成者也。

韓文治不收聲。事出名上。按禮表記。唯欲行之。浮于名也。係韓語意所本。約六經之旨成文。此其一端。韓與陳給事書。愈也道不加脩。而文日益有名。又曰。聰明不及于前時。道德日負于初心。其自歎也如是。不似宋儒專事矜已抑人。

吾于古無似也。而于昌黎與崔虞部書。所謂惟念得失。固有天命。不在趨時。而偃仰一室。嘯歌古人者。竊亦敢自况焉。

楊升菴曰。陸機文賦。謝朝華于已披。啓夕秀于未振。昌黎謂惟陳言之務去。戛戛乎其難哉。李文饒曰。文章如日月終古常見。而光景常新。此古人論文之要也。

國史補。韓愈與陸長源同在使幕。或譏其年輩相懸。周愿曰。大蟲老鼠。俱爲十二屬。何怪之有。此語本出周愿餘冬敍錄。訛爲退之語。韓謂李程曰。崔大丞相羣同年往還。直是聰明過人。李曰。何處過人。韓曰。與愈往還三十餘年。不會說著文章。劉夢得詩話云。爾今讀其與崔羣書。何等懇至。恐不如此輕薄也。昌黎論文。當合進學解。潮州刺史謝上表。上宰相書。上兵部李侍郎書。與孟尚書書。答崔立之書。答李翊

書答劉正夫書、答尉遲生書、答呂醫山人書、送孟東野序、荆潭唱和詩序、貞曜先生墓誌銘、樊紹述墓誌銘、觀之乃備。而其所謂憚赫若雷霆，浩汗若河漢，正聲諧韶蕪，勁氣沮金石，益而不餘一言，約而不失一辭，贊于頤，實自道也。文極于此矣。

橫空盤硬語，妥帖力排奡。玉磬聲響，金鈴個個圓。必兼之，而韓文之妙乃盡。橫空盤硬，則其本也。

皇甫湜昌黎墓誌，先生七歲好學，言出成文，及冠，恣爲書，以傳聖人之道。人始未信，既發不掩，聲振業光。衆方驚爆而萃排之，乘危將頽，不懈益張。卒大信于天下。先生之作，無圓無方，至是歸工抉經之心，執聖之權。尙友作者，跋邪瓶異，以扶孔氏存皇之極。知與罪，非我計。茹古涵今，無有端涯。渾渾灑灑，不可枚挍。及其酣放，豪曲快字，凌紙怪發。鯨鏗春麗，驚耀天下。然而栗密窈渺，章妥句適，精能之至，入神出天。嗚呼，極矣！後人無以加矣。姬氏以來，一人而已矣。又曰：平居雖寢食，未嘗去書，怠以爲枕，殫以爲飴。口講評，孜孜以磨諸生，恐不完美游，以詼笑嘯歌，使皆醉義忘歸。嗚呼，可謂樂易君子鉅人者矣。李翹祭文，撥去其華，得其本根。開闔怪駭，驅濤湧雲，包劉越羸，並武同殷。六經之學，絕而復興。學者有歸，大變于文。李漢序文者，貫道之器也。不深于斯道，有至焉者否也？又曰：自知讀書爲文，日記數千百言，比壯，經書通念曉析，酷排釋氏。諸史百子，皆搜抉無隱。汗瀉卓踔，淥滋澄深。詭然而蛟龍翔蔚，然而虎鳳躍鏘。然而韶鈞鳴日，光玉絜周，情孔思千，態萬貌。卒澤于道德仁義，炳如也。洞視萬古，愍惻當世，遂大拯頽風。教人自爲，時人始而驚中而笑，且排先生志益堅。終而翕然隨以定。嗚呼，先生之于文，摧陷廓清之功，比于武事，可謂雄。

偉不常者矣。合三公之言，韓文可得其概。

張籍祭退之詩云：獨得雄直氣，發爲古文章。言約而盡，又籍贈孟郊淳意發高文，亦至語。

朱子王氏讀經說退之原道諸篇，則于道之大原若有非苟揚仲淹之所及者。然考其平生意鄉之所在，終不免于文士浮華放浪之習。時俗富貴利達之求，而其覽古今之變，將以措諸事業者，恐亦未若仲淹之致懇惻而有條理也。說恐未允。以文而論，欲盡掃其浮華放浪，則必不求極文之致始可。不然，平正之餘，溢爲光怪，以竊附于易奇而法詩正而葩之例，豈見惡于孔子者耶？且以浮華放浪評韓，直噬語耳。或謂韓文謹嚴而奇崛，李習之得其謹嚴，皇甫持正得其奇崛，又謂韓學獨孤及，特及當變格之初明而未融。歐陽公早工儼偶之文，得韓法于尹洙，而洙簡嚴，歐曲折迴異，又謂韓鎔鎔羣言，自然高古，皇甫湜有意爲奇，孫樵刻意求奇。

池北偶談：皇甫湜諭業一篇，備論諸家之文曰：韓吏部之文，如長江萬里，一道衝飈，激浪潮流不滯，然而施之灌漑，或爽于用。按此竟與所作墓誌相戾，非確論也。韓文何所不宜哉。

楊升菴曰：韓文與大顛書明係彼教假託。李翰編韓集，自云收拾無遺而不載此，此鐵案也。朱紫陽必信之，以故入韓公之罪，不知何心也。

陸希聲序李觀文云：觀尙于詞，故詞勝其理；愈尙于質，故理勝其詞。使愈窮老不休，終不能爲觀之詞。使觀後愈死，亦不及愈之質。據此言，是以李與韓並論，而無所軒輊矣。夫文之所貴者理而已，理足而以詞

輔之以理論韓或猶有未足以詞正皇甫持正所謂無圓無方至是歸工者也若如李觀則浮詞而已矣胡致堂謂唐臣以封禪爲非者惟柳子厚一人而已然則子厚之識豈可盡非哉

文之是非在理義上見文之工拙在詞調上見有理義而兼有詞調者是而工者也有理義而欠詞調者是而拙者也理義欠而有詞調者非而工者也無理義兼無詞調者非而拙者也場中遇合之文是而工者固多非而工者正復不少是而拙者僅有之非而拙者更希有之理義于文固重詞調斷不可輕矣昌黎論文之語甚多其要有曰約六經之旨而成文又曰惟陳言之務去又曰師其意不師其辭又曰惟古于詞必已出降而不能乃剽賊後皆指前公相襲又曰醇然後肆尤要在師其意不師其詞師其意所謂約六經之旨也不師其詞所謂惟陳言之務去也卽所謂辭必已出也師其詞則陳言剽賊矣詳讀公文除明引詩書外用古書語者極少無非從古語點化而出所以能合集衆美自成一家意以稽古爲法故醇詞以獨造爲奇故肆聖于文者古今一人而已

大家者曷于此而思之

劉夢得序柳集曰三光五岳之氣分太音不完必混一而大振貞元中天下文士如繁星麗天而芒寒色正人望而敬者五行而已子厚斯人望而敬者與

後世講道學者，每以苛刻論人而不惟其實。不求其允。今之集矢于子厚者，蓋猶萬口一聲，不知孔子謂无咎者善補過也。如子厚晚年之政績，真善補過者，且其始附叔文，固有躁進之失，然意在行道，故其所拔皆善類，與小人之朋邪害正者迥殊。孔子曰：觀過斯知仁矣。安得不原其本心，一例貶之哉。

弔賀互翻，始于晉語。叔向對韓宣子，繼于史記。蒯通說范陽令，終于子厚賀王進士書。文章機杼，必有來歷。特善變者工耳。

腐儒輒咤口薄，柳子厚不知道。然觀其報袁君陳書曰：其歸在不出孔子。此其古人賢士所懔懔者。送徐從事北遊書曰：苟開傳必得位，得位而以詩禮春秋之道施于事，及于物，思不負孔子之筆舌，能如是，然後可以爲儒。儒可以說讀爲哉。由前之言，大體正矣。由後之言，實用精矣。大體正，實用精，非道而何？空談性命以爲道，正以說讀爲儒者也。是子厚之所笑也。

續孟子唐林慎思虔中撰，虔中死黃巢之亂，大節甚著。人品頗高，獨此一續，殊爲蛇足。理既爲孟子棄餘筆，更庸拙。所著仲蒙子三卷，稍工。其設名岸、嶺、拗、澗、砾、碣、弦、牧、鞠、穠、甌，亦殊太怪。

唐人孫樵實勝李翹，其驛記等篇，邊幅雖狹，頗有姿致。若翹則平平無取耳。皇甫持正以作昌黎墓誌爲生平傑作，其他未免秦武王舉鼎，債筋絕臍之態。

唐文韓柳外，當推元白筆爲俊爽。杜牧之皮製美，皆不及也。牧之惟阿房一賦，超出輩流。

劉蛻文冢銘，陸魯望野廟碑，自成一種奇文，夐乎不可及也。

王元之文亦從韓柳出。待漏院記便用盤谷序機軸。竹樓記便用柳州諸記機軸。詩則全摹少陵。皆爲升堂之選矣。

范文正嘗言：士當先天下之憂而憂，後天下之樂而樂。後爲岳陽樓記，遂著其語。可見前輩作文必多平日心得之言，非猝辦可比。

后山詩話：范文正公爲岳陽樓記，尹師魯讀之曰：傳奇體耳。傳奇，唐裴硎所著小說也。按此乃過抑之言。未可爲據。然足見古文之難。如范公猶未足當家也。司馬溫公上龐丞相啓云：光于屬文，性分素薄，又懶爲之。當應舉時，強作科場文字，終不甚工作古文，又不能刻意致力。迂僻鄙俚，無益世用。此雖公之謙言，然非深知甘苦者不能道。南宋以後，古文可看者多，可讀者少，皆不能刻意致力之故也。

溫公五規務實篇，凡此十者，皆文具而實亡。本失而未在譬，猶膠板爲舟，搏芥爲楫，敗布爲帆，朽索爲維，畫以丹青，衣以文繡，使偶人駕之，而履其上，以之居平陸，則渙然信可觀矣。若以之涉江河，犯風濤，豈不危哉？按此千古粉飾之炯鑑也。

范百祿子功鎮對制科策商湯之過，以旱災而改。中宗之過，以拱木而改。高宗之過，以碓雉而改成。王之過，以雷風而改。宣王之過，以雲漢而改。按此最排疊聳目。

劉貢父謂永叔雖儉，不傷事主。諱語能道出學文至訣。

池北偶談：劉原父惜歐九不學。歐對仁宗謂劉敵文亦未佳。其博雅足重也。二公似以名高相失。按此正

歐劉相知之深，非相失也。

桑世昌蘭亭考。歐陽記真州東園，汎以畫舫之舟。曾子固亦以爲疑。

楊升菴曰：孔叢子載孔子之言曰：古之聽訟者惡其意，不惡其人。求其所以生之，不得其所以生，乃刑之。歐陽永叔瀧岡阡表，求其生而不得云云。本此誤也。

楊用脩曰：通鑑載吳越王錢宏佐復其境內稅三年，事甚詳。歐陽五代史獨言錢氏之重歛，胡致堂信司馬而疑歐陽。按宋代別記載永叔爲推官時，昵一妓，爲錢惟演所持。永叔恨之後作五代史，乃誣其祖以重歛，挾私怨于褒貶之間，何異于魏收輩耶？又曰：宋人譽五代史勝于史記。夫史記自左氏而下，未有其比。非特太史筆力亦由其書會輯左氏、國語、戰國策、世本及漢代司馬相如、東方朔諸公文章，以爲模幹也。五代史有是乎？况其筆亦萎靡不足爲司馬家奴，而云勝之耶？按予癸巳冬在武昌學使署，曾細讀五代史一過，心竊不滿，甚服用脩之卓見也。

歐作有美堂記，錢塘自五代知尊中國，及其亡也，頓首請命。按錢氏本自入版圖，而歐乃謂其亡，而頓首請命于錢，多苛論，即此可見。

五代史考證通鑑胡三省注考異十國紀年謂錢鏗窮極侈靡，末年荒恣尤甚，賦歛苛暴，人苦其政。吳越

備史稱鏐節儉衣衾用油布常膳惟瓮漆器又錢易家話稱鏐公妾不貳羹哉衣必三滌然後易按錢鏐起于貧賤知民疾苦必不至窮極侈靡其奢汰暴斂之事或其子孫所爲也

浦二田曰司馬歐陽二家綱十七史起止

五代史唐昭宗乾甯三年改錢鏐鄉里曰廣義鄉勳貴里營曰衣錦營又升衣錦營爲衣錦城石鑑山曰衣錦山大官山曰功臣山鏐游衣錦城宴故老山林皆覆以錦號其幼所戲大木曰衣錦將軍天復二年封鏐越王又梁封鏐吳越王客有勸鏐拒梁命者鏐笑曰吾豈失爲孫仲謀耶遂受之按鏐之厚斂于越或屬傳疑負心于唐實無可道使其拒梁興師爲唐復仇豈非千古烈丈夫哉

五代史世家總論嗚呼自唐失其政天下乘時鯨髡盜販袞冕峨巍吳暨南唐姦豪竊攘蜀險而富漢險而貧貧者自彊富者先亡閩陋荆蹙楚開蠻服剝剽弗堪吳越其尤牢牲視人嶺蠻遭劉百年之閒並起爭雄山川亦絕風雲不通語曰清風興羣陰伏日月出爝火息故真人作而天下同作十國世家按此歐文之極研鍊者彷彿昌黎諸誌銘非庸常史筆所能逮也

五代史德光死述律太后不哭而撫其尸曰待我國中人畜如故然後葬汝按此爲彼國起見綱目待諸部寧一如故則葬汝矣改作冠冕語非其本意也史有以脩飾而失者皆此類

宋文決推蘇明允爲真古文朱子謂退之明允專摹古人聲響必期于肖而後已以韓並數推明允亦至矣

蔡聞之選古文雅正以明允爲駁只錄族譜引一篇然如上韓昭文論山陵書聖人復起不易其言亦可以爲駁耶明允之言存乎人之善取裨益君國者正多未當概指爲駁一例屏之也蔡氏拘儒何足語此明允上田樞密書足以廉頑立懦當與孟子並垂而棄天變天之論諸道學又時竊其說

據莊子管仲將死薦隰朋明允管仲論未爲定案

晁陳二氏記錄薦明允于歐陽者張益州也世知之有雷簡夫者薦尤力世罕知也

浦二田曰朱子斥明允論六經看聖人全以術欺天下而在陸以爲有道而無術則道不行蓋欲以蘇張之術濟孟韓之道期于必行而已矣儲門之旨大率祖漢而祧宋先蜀而後洛端倪于此予置易禮樂詩書諸論而收幾策等竊謂縱橫家規時措事但率其言之所自至不必援經以飾之于世自有用按論明允以浦氏之言爲斷朱與儲皆偏

明允之文一味生辣永叔子瞻子由皆閒以甜熟矣雖不必以彼廢此而文品自此而判

宋孝宗蘇軾贊維古于文言必己出綴詞緝句文之蠹賊手扶雲漢幹造化機氣高天下乃克爲之猗嗟古人冠冕百代忠言讜論不顧身害凜凜大節見于立朝放浪嶺海侶于漁樵歲晚歸來其文益偉波瀾老成無所附麗昭晰無疑優游有餘跨唐越漢自我師模賈馬豪奇韓柳雅健前哲典型未足多羨敬想高風恨不同時掩卷三歎播以聲詩

蘇子瞻于其生也林子中嘗稱之曰父子以文章名世盡淵雲司馬之才兄弟以方正決科邁晁董公孫

之學于其死也李方叔嘗悼之曰皇天后土識一生忠義之心名山大川還千古英靈之氣孟子曰好名之人能讓千乘之國苟非其人簞食豆羹見于色晉鄒湛對武帝言猛獸在田荷戈而出凡人能之蜂蠻作于懷袖勇夫爲之驚駭出于意外故也東坡黠鼠賦人能碎千金之璧而不能不失聲于破釜能搏猛虎而不能不變色于蜂蠻蓋兩運其意而排疊溜利頓覺改觀

東坡賈誼論生之不能用漢文也或謂用字語病然孟子王猶足用爲善乃其所本

蘇子瞻作表忠觀碑荆公歎其似史記秦楚之際諸侯王年表傳記載此說者甚夥艮齋雜說則謂荊公讀此碑歎賞良久曰此三王世家體也按史記三王世家直書大司馬臣去病諸臣疏中間以制曰下御史結以制曰可表忠觀碑直敍臣抃言後結以制曰可正用世家記言之體與年月諸表自立議論者迥別尤說甚合

子瞻諸論以志林中平王始皇戰國任俠數篇爲上留侯量錯次之荀卿韓非賈誼俱未平允大臣朋黨二論似爲調停小人起見殊與生平大節不符至正統論三篇彊辯無理儲同人反推爲第一何耶書籍古人已有畢生讀不盡之歎何況今日善乎蘇文忠之言曰書富如入海百貨俱有之人各得其所欲求者耳但求之有道須擇其要而取之故韓子曰纂言必提其要紀事必鉤其元

退之曰辱示初笙賦實有意思但力爲之古人不難到子瞻曰亦使蜀中見者長意思也韓蘇之貴意思如是蘇于海外教人作文一言以蔽之曰意而已

蘇文忠戒李方叔曰。人于出處。稍不靜重。非徒無益于道德。有邱山之損矣。非知道者不及此。又答方叔書曰。不有益于今。必有覺于後。決不碌碌與草木同腐。今之視公何如哉。可謂不負其言矣。每思此言。發人遠想。

蘇子瞻黃州怪石供。有曰。凡物之醜好。生于相形。吾未知其果安在也。使世閒石皆若此。則今之凡石。復爲怪矣。海外有形語之國。口不能言。而相喻以形。以其形語也。捷于口。使吾爲之。不已難乎。故夫天機之動。忽焉而成。而人真以爲巧也。

黃山谷謂潘大臨曰。子瞻論作文法。須熟讀檀弓。大是妙論。

才之大者。無過于左氏。司馬子長。才之奇者。無過于莊子。才之全者。無過于蘇子瞻。左史莊蘇。古今之四絕也。

蘇子南行敍。古之爲文者。非能爲之爲工。乃不能不爲之爲工。能爲者。富于取材。苦于造句。而于篇翰。究成撫仿塗飾而已。惟胸有古今。包羅旁魄。隨觸而發。無意于文而文焉。所謂不能不爲者也。按此有一末一本之殊。

東坡對司馬溫公曰。犢子雖俊可喜。終敗人事。不如求負重有力。而馴良服轍者。使安于八達之衢。爲不誤人也。

曲洧舊聞。東坡見晁伯宇賦曰。凡文至足之餘。自溢爲奇怪。今晁傷奇太早。可作魯直意微喻之。而勿傷

其邁往之氣。伯宇自是文章大進東坡之語委曲如此可謂善成就人物者也。

歐公最賞東坡文。每一篇到爲終日喜。謂子棐曰。三十年後人更不道著我也。後朝廷雖禁止。賞錢增至八十萬。禁愈嚴而傳愈多。士大夫不能誦坡詩。便覺氣索。而人謂之不韻。詳曲洧舊聞。

蘇文忠曰。夫破人之惑者。難與爭于篤信之時。待其有所疑焉。然後從而攻之可也。按此最得告人之旨。東坡赤壁賦。此造物者之無盡藏也。而吾與子之所共適。古今駐訛。適爲食。穿鑿其說。謂食者自己之真味。受用之正地。援引素問精食氣形食味。與壯火食氣。氣食少火爲證。殊堪噴飯。不知適字穩愜。不待解說而明。凡彊作解事者。皆共食之類也。至謂一本作樂差近然。去適字遠矣。適者忘乎其樂者也。

東坡好佛。然對朝廷言。則闢佛。其達而知大體如此。向見及此。適閱丹鉛總錄。楊用脩已先我得之。坡賀坤成節表。放億萬之羽毛。未若消兵以全赤子。飯無數之縑褐。不如散廩以活飢民。至哉言乎。左傳不如早爲之所。蘇文柰何不爲之所也。此運古入化處。

蘇子瞻斥荀子薄揚子譏李陵答蘇武爲齊梁小兒語。鄙孟東野爲小儒。皆過于刻。而朱晦翁斥子瞻亦過于刻。曾子曰。出乎爾者反乎爾。然哉。然哉。

宋人之苛論古人。歐陽永叔啓之。蘇子瞻繼之。朱晦翁抑又甚之。

蘇子瞻論范增未允。謂增當去于殺卿子冠軍時。按此時項羽爲次將。增爲末將。羽誅宋義。增無一言。其後與羽一心。是誅義必羽增同謀也。義逗遛本可誅。且義不誅。章邯不破。秦兵正彊。卽沛公何能乘閒入

關哉。論當日破秦之功，自以羽破邯之戰爲第一，反以誅義爲罪，謂增當去之，不亦僨乎？

楊升菴曰：朱元晦以王安石列名臣錄，安石之禍宋元惡大，懃罪浮其驩，則深贊之。蘇文忠公文章忠義，古今共仰，乃力詆之，以安石之姦，則未減其已著之罪；以蘇子之賢，則巧索其未形之斑，此何心哉？池北偶談：孔文仲號正人，而攻伊川，謗爲五鬼之魁。朱元晦以蜀洛之故，甘心蘇氏，更有甚焉。至謂蘇氏之學害天理，亂人心，妨道術，敗風教，一偏之論，乃至于此。又云：朱子左祖王介甫，而詆二蘇，取呂惠卿而不取秦少游，恐難以一手揜萬世耳目也。

宋史稱蘇子瞻言足以達其有猷，行足以遂其有爲，節義足以固其有守，皆志與氣爲之也。允爲定論。王聞脩堅志曰：蘇氏上書，動至數千言，計仁宗、神宗好文，二蘇受知又深，故得盡徹天聽，此未可爲諫君之法。善乎韓忠定之言曰：無太長，上覽弗竟也；無太文，上覽弗解也。斯語最中肯綮。按宋人奏議，往往失之太繁，至南宋理障重重，覩縷不絕，尤足厭目。蓋北宋不柰許多才學何，南宋不柰許多道學何，其實才愈大，應愈鍊，不應愈冗，道愈高，應愈簡，不應愈繁，不得不推昌黎佛骨表等篇，愜心貴當也。若在漢，則相如諫獵書，允推第一。

易坎六四納約自牖，謂擇簡要之言，因君心之所明投之，爲千古告君良法。有宋諸公，殊失此義。曾子固下筆，目無劉向，無論韓愈。夫子固豈能勝劉韓？學者自立，正當如此。不然，無以爲子固也。曲洧舊聞：曾子固性矜汰，多于傲忽。元豐中，爲中書舍人，因白事都堂，章子厚爲門下侍郎，謂之曰：向見

舍人賀明堂禮成表。真天下奇才也。曾一無辭讓。但曰。比班固典引如何。章不答。語同列曰。我道休撩撥。蓋自悔失言也。子固路遇徐德古。迎接甚恭。子固卻立曰。君是何人。德古因自敍。子固曰。君便是徐孺耶。領之而去。

王安石壻蔡卞。稱安石奮百世之下。通乎晝夜陰陽而神。著雜說萬言。與孟子相上下。著字說。包括萬象。與易相表裏。固屬阿譽之說。然王氏文辭可取者多。言之不可信人如此。言之不可以人廢又如此。池北偶談載穆公孔暉論安石一書。極痛快。

介甫多思而喜鑿時。出一新說。已而悟其非。又出一說以解之。是謂小人之過也必文。

唐宋八家初爲八先生集。實訂于明朱右茅鹿門特踵其說耳。八家之理不必盡醇。而其文則南宋以來。無能出其範圍者。何李一倡秦漢之說。而牛鬼蛇神已不可耐。是真可八而不可九哉。

韓之文。揚而明。乾也。柳之文。抑而奧。坤也。歐陽可悅。受以兌。老蘇可畏。受以震。離其大蘇乎。文而明。巽其小蘇乎。婉而章。百折不窮。王爲坎。守經不渝。曾爲艮。自荀卿以至于蘇曾。皆經世之文也。去其駭者。而醇者。不可廢矣。一例屏之。愚也。宋五子。則明道之言也。宗其是者。而非者亦必置矣。一例拘之。亦愚也。讀八家。當去其支辭。讀五子。當去其理障。

公是弟子記。父劉原進莫若讓。勇莫若義。貴莫若仁。富莫若廉。按旨哉。數言用之不盡。

曲洧舊聞。東坡祭劉原父文云。大言滔天。詭論滅世。蓋指介甫也。介甫以經術自尊大。惟原父敢抑其鋒。

彼故表之。

黃山谷五歲能誦五經。其終身所得止于是何耶。朱子言山谷善言文至作時便氣餒毋亦所讀之經未能實有所得與。

東坡謂秦少游得吾工。張文潛得吾易論者謂張尤難。蓋不工不可以爲易也。然工其首務哉。  
籍湜郊島盡列韓門。黃秦陳晁同爲蘇客德鄰之契盛有如斯。

曲洧舊聞古語大匠不示人以朴。蓋恐見其釜鑿痕也。黃魯直得宋子京唐史藁一冊。熟觀之文章日進。無他見其造易句字勝初造處也。歐陽文成與始落筆十不存五六班固云急趨無善步良有以也。

程伊川上仁宗皇帝書。昔漢武笑齊宣不行孟子之說。自致不王而不用仲舒之策。隋文笑漢武不用仲舒之策。不志于道而不聽王通之言。按漢書隋書及諸雜紀具在。無此二說。豈伊川白撰而出。伊川素薄文家似此杜撰。反不如文家之言信而有徵矣。又其書以諸葛孔明董仲舒王通自比。且云臣雖不敢望三子之賢。然臣之所學三子之道也。云云。是三子儼然真儒矣。何又有孟子死千載無真儒之說。凡此自言自悖愈駕愈高實蒙所不解也。

伊川上仁宗書。聖人垂教思以治後世。而愚者謂不可行于今。則將守聖人之道乎。從衆人之言乎。謂衆人以王道可行。則欲詰瞽者以五色之鮮。詢聾者以八音之美。其曰不然宜也。彼非憎五色而惡八音。聞見限也。此段却說得好。

東萊博議，借駁雜之人情發精粹之天理，曲折透快，而衷于道，不合者亦鮮矣。其文之排疊，導源于鄒枚之體，其理則六經之支流也。朱子嘗譏其講左氏，彼豈囿于左者哉。

東萊爲諸生節唐書，謂字欲少而事欲多。

宋羅從彥謂三代人才得周孔之心，而明道者多至漢唐以經術古文相尙，而失周孔之心，故明道者寡。此蓋爲專用心于文者發耳。不然，周孔之心，豈在經術古文之外？且漢唐之經術古文，豈能遠勝三代？吾恐正經術古文之有所未至，而非以經術古文相尙之咎也。夫子首教必以文，固指六藝而言，然卽六經之文辭觀之，又豈後人之所敢望者哉？程伊川嘗言：文辭若一向好著，豈能與天地同其大？吾謂此正當分別論之。一切抽黃配綠，雕文刻須之辭，固難與天地同其大。若夫經術古文，則正六經之支流，而藉以維持古今者，可一例屏之哉。

朱子讀唐志，謂自古之聖賢，其文可謂盛矣。然初豈有意學爲如是之文哉？是亦力闢辭章之學，而失之過高者也。果然，則孔子何以有草創討論脩飾潤色之說乎？又何以分文學爲一科乎？但文行鏤分輕重，孔子曰：文莫吾猶人也。躬行君子，則吾未之有得。教人之旨備矣。

書官爲褒削，官爲貶。自是通例。通鑑綱目每以書官爲貶，是爲自亂其例。若必待後人發明而始知，則筆削之意晦矣。綱目多不愜人意，此其一也。

有文學有理學，理學精矣。然文學非得天獨厚，而實能讀書有得者不能。理學則勦襲腐語，可貌爲之，周、

程、張、朱以後。土飯陳羹。架屋疊牀。轉不如發爲文章。見諸事業者。實而可徵也。文學之名。始于孔門四科文。卽道也。卽理也。舍道與理。豈復有文哉。宋儒因後世之溺于文辭。輕視文學。而高自位置。曰道學。曰理學。其流弊仍空言無實。不但萬不及孔門之文學。並不及後世文辭之學。然則人亦務實行耳。何必抑文學而伸理學哉。

最可笑者。宋史之分儒林道學爲二也。儒之外。豈有道哉。道之外。又豈有儒哉。此不惟無益于道。而害道滋甚。何也。道者公也。門戶者私也。以私害公。宋史作之俑也。

朱子謂趙岐注孟子拙而不明。東漢文之弊也。王弼注易巧而不明。六朝文之弊也。除此二弊。始可言文。  
上蔡語錄。橫渠著正蒙時。處處置筆硯。得意卽書。伯淳云。子厚卻如此不熟。按熟之一字。難言哉。劉晏會計。熟見錢流地上。庖丁目無全牛。伯樂所見。無非馬者。熟之謂也。然得意卽書。正足爲我輩生手立法。急起而追。其所見東坡亦云。  
近人有教作文法者。機神一到。捉筆迅埽。瑕字句姑置之。稍縱即逝矣。實得箇中甘苦。

朱子謂橫渠作正蒙。不會睡。王荊公作字說。亦不會睡。後人謂橫渠熬得有益。荊公熬得無益。然會意之法。豈盡可泯。閒嘗思得數字。如有子爲存。有士爲在。自大爲臭。一和爲香之類。皆有至理。但不知亦蹈連爺搭娘爲九鳥之誚否。

左邱明。古論語訓云。魯太史。史記十二諸侯年表序。魯君子左邱明。則爲魯人無疑。獨鄭夾漈通志序曰。左氏楚人。其書多楚語。公羊齊人。其書多齊語。又譏史記本之爲俚。公羊齊語說見注疏。不知所謂楚語。

及俚者果何在也。豈於菟之類與。日知錄亦云公羊多齊言淮南多楚語若易傳論語何嘗有一字哉。然今取公羊讀之不覺齊語之累也。人患不能文耳能文則方言亦增古趣必概斥之何以處大學苗碩之諺孟子鉉基之言哉。詩經開口闢闔二字即是方言史家紀實更當別論特恨無左公手筆耳鄭顧之徒博覽則有之于文事之妙正隔。

維古于辭必已出降而不能乃剽賊後皆指前公相襲昌黎數語古今定案蓋後人才力日薄勢不能自作一語且古語相形杜撰者必覺可笑字字尋來歷實萬不及古人處若以後人指前相襲之見反議古人辭必已出之書爲俚爲俗豈不妄甚。

金高陵揚興宗當宋南渡著龍南錄以見正統之所在見元裕之記與習鑿齒身居晉世而能以蜀爲正統者同矣然金當日不以楊爲罪亦厚矣哉。

宋史載章惇用事嘗曰元祐初司馬光作相用蘇軾掌制誥所以能鼓動四方乃使林希典書命逞毒于元祐諸臣是故元許衡謂姚燧曰弓矢爲物以待盜也使盜得之亦將待人吁可畏哉。

宋史丁謂命宋綬草寇準責辭令用春秋無將漢法不道綬雖從謂旨然卒改易及謂貶綬卽草詞曰無將之罪舊典甚明不道之誅常刑罔赦朝論快焉餘冬敍錄載龍川志亦敍此事而宋綬作宋庠又其辭作無將之罪深著于魯經不道之誅難逃于漢法五總志則以爲楊文公志乃宋吳炯作其說尤在前矣學與文一而二者也兼長者鮮矣少于左史韓歐之書者不能文爲其已薄也多于左史韓歐之書者不

能文謂其已滯也。鄭夾漈譏太史不博。王荊公笑歐九不學。然終不掩其文之妙者。用心于文者多也。徒博徒學而其文反不妙者。用心于文者少也。夾漈是也。徒博徒學可以勉而能文不可以彊而致。東坡嘗謂劉壯興道原曰。三國志注中好事甚多。道原欲脩不果。君不可辭。劉曰。端明曷不爲之。坡曰。某雖工于語言也。不是當行家。詳曲洧舊聞可見考據與文章是一是二。坡蓋有不暇耳。

著書之道在于忠。不忠則剽剥欺謾之弊作。閱書之道在于恕。不恕則刻覈鍛鍊之患生。明人之書。剽剥欺謾。自所不免。而顧炎武輩詆之。或以一字斥一書。或以一書斥一代。鍛鍊酷毒亦甚矣。凡書必有可取之處。舍短從長可也。

簡明書目。謂明人首推楊升菴爲博洽。今按之信然。且其持論尤心術正。其訛謬皆無心之失。然亦鮮矣。顧炎武、閻若璩輩皆不及也。閻氏四書釋地、潛邱劄記竊升菴說而掩其名。如百姓謂百官四海有二說之類。不一而足。至陳耀文等之攻楊。尤蚍蜉撼大樹矣。近李雨村刊函海叢書。收升菴遺跡最多。

楊用脩曰。宋人多言而好前偏彊而無本。其說理也。解經也。論文也。評詩也。一而已矣。按此語似乎太過。實深中其弊。非升菴之明識。不能言也。

五代史明宗謂其子從榮曰。經有君臣父子之道。然須碩儒端士。乃可親之。吾見先帝好作歌詩。甚無謂也。汝將家子文章非素習。必不能工。傳于人口。徒取笑也。吾老矣。于經義雖不能曉。然尚喜屢聞之。其餘不足學也。按明宗可謂知務矣。不但帝王宜知此。卽士人亦宜知此。經書隨分讀之。皆有益。若詩文實有

天焉不可彊也。未能見工。不如藏拙。

又崔瑒不識文字。而虛有儀表。號爲沒字碑。

晉景建善射。嘗教其子延廣曰。射不入鐵。不如不發。是說也可通之于學。

陸文安送宜黃何尉序最佳。當推南宋文第一。民甚宜其尉。甚不宜其令。甚不宜其尉。是令尉之賢否。不難知也。尉以是不善于其令。令以是不善于其尉。是令尉之曲直。不難知也。此種高妙。雖韓柳不多覩。結云。何君尙何憾。雖然。何君之心。何君之學。遽可如是已乎。不然。何君固無憾。吾將有憾于何君矣。曲雋有味。不必理語重重。疊牀架屋。始堪勉人進德也。

朱文公答韓尚書書。烹猶介之性。矯揉萬方。而終不能回迂疏之學。用力既深。而自信愈篤。自知決不能與時俯仰。以就功名。二十年來。自甘退藏。以求己志所願欲者。脩身守道。以終餘年。因其暇日。諷誦遺經。參考舊聞。以求聖賢立言本意之所在。既以自樂。閒亦筆之于書。以與學者共之。且以待後世之君子而已。此外實無毫髮餘念也。按此字字皆鄙心所欲出者。讀之不禁手舞足蹈也。

文公上宰相王淮書。規畫荒政最善。其一曰。廣糴米斛。以備支撥。其二曰。連行賞典。以勸捐輸。皆切中事情。但後幅云。明公不如早罷其官守。烹謹當穀口結舌歸臥田間。養雞種黍。以俟明公功業之成。羞愧以死。是亦明公始終之厚賜也。嗚呼。何其忿。與文公自言氣質上有病。多在忿懥。此其一也。予之忿懥受病尤深。因以自警。

潛邱劄記云爲命一章卽聖人教人作文之法詩可以興一章卽聖人教人作詩之旨其論最妙然後人于作文草創脩飾潤色皆有而討論多闕作詩與觀羣怨草木鳥獸皆有而事父事君多缺人可不知所重哉

才與不才豈有常也世所用楩梓豫章也則楩梓豫章才而櫟不才矣世所用櫟也則櫟才而楩梓豫章不才矣歸震川爲張餘峯櫟全軒記云爾真通論也顧天石彩焚琴子傳今天下將有變得如余者數輩委以兵農財賦諸大政猶可鎮定顧乃鬱鬱以青衿子困英雄俾兒曹口臭者登廊廟而食肉誠何爲哉誠何爲哉按此真古今一概傷心豈獨焚琴子哉

沈確士曰李將軍不侯而李蔡下中人侯從古已然且傳不傳不在名位葆真培根學人所重按數語可消人無限躁心壯人無限正氣

歸愚解文毅籍集序人之死生有不可以常情測者公在洪武時抗直敢言宜乎得禍而帝受言納諫極君臣相遇之隆在永樂時委婉孫言宜乎邀福而帝惑于諧言致不得終老牖下按解下詔獄錦衣帥紀綱毒刑斃之何如當日靖難兵入與周是脩同死豈非一烈丈夫哉

任真二字出晉書王導傳任真推分語予嘗謂君子惟任真故百爲百成小人惟不任真故百爲百敗然舉世不任真成俗有一任真者轉受其毒矣予性任真思此悚然然差有把握處卻在此南史元帝性愛書籍令左右讀書直至五人各伺一更恆致達曉常眠熟大鼾左右有睡讀失次序或偷

卷度紙帝必驚覺更令追讀顏之推曰元帝倦劇愁憤輒以講自解亦古今之一癖矣

馬端臨貴與著文獻通考元王壽衍進表云前宰相碧梧先生廷鸞子再任衢州路柯山書院山長又云議論本諸經史而可據制度會之典禮而可行

文太師彥博題程伯淳墓碑爲明道先生伊川受之而不辭然明道實仁宗年號也于臣子之心安乎此後世之必不可行者也

漢末有三李杜謂李固杜喬李雲杜衆李膺杜密也皆被害唐之李太白杜少陵亦以李杜稱然太白非郭汾陽必不免少陵亦幾爲嚴武所殺李杜抑何不幸邪李商隱杜牧時亦稱李杜然而小矣

元好問謂趙氏秉文字周臣之文出于義理之學故長于辨析極所欲言而止不以繩墨自拘

喻樗宋人陳櫟元人

今以入相爲大拜金劉京叔祁歸潛志卷十記張仲淹事有云不然大拜矣是金時已有此語  
掩晉覺引也較也莊子徐無鬼篇則可不謂有大揚掩者乎漢書敍傳揚掩古今左思蜀都賦請揚掩而陳之北史崔孝芬傳商掩古今是商掩卽本揚掩爲義謂商量比較也近人誤爲商確然黃山谷與人論文書作文要商確精通或以爲商確語所自出予謂此必傳刻之訛必云商掩精通猶言商較精通方成文理不然確精通三字連綴豈復成語哉清波雜志亦有通情商確語則亦誤耳

魯魚帝虎從古歎之如史記引繩披根訛用批根朱子語類曾辨之韓文目撫耳染訛用作目濡之類不

可勝數。

管子君不奪農時則一國之人皆有餘食矣。不奪蠶要則一國之人皆有餘衣矣。古今販蠶要者亦謂切要之時也。

後漢書劉元傳論夫爲權首鮮或不及陳項且猶未興况庸庸者乎按權首猶左傳始禍之意傳曰無始禍莊子曰無爲禍首前漢書曰無爲權首將受其咎

後漢書鄭興傳帝嘗問興郊祀事曰吾欲以讖斷之何如興對曰臣不爲讖帝怒曰興之不爲讖非之邪興惶恐曰臣于書有所未學而無所非也帝意乃解是不爲讖乃興事或誤爲鄭衆衆乃興子也無此事鄭衆爲大司農或謂注疏中所謂鄭司農乃衆非康成然康成傳載公車徵爲大司農以病自乞還家是康成正可稱司農也經注屬康成多屬衆甚少疑所謂鄭司農仍指康成也

池北偶談家語禮運篇官有銜職有序注銜治也執轡篇古之銜天下者以六官總治焉故曰銜四馬者執六轡銜天下者正六官官銜之義本此

風聞二字始見趙佗報文帝書

爾雅不律謂之筆武王筆銘毫毛茂茂莊子宋元君畫圖衆史舐筆和墨可見筆自古有之且子張書紳非筆莫能爲也韓毛穎傳謂蒙恬造筆何燕泉謂作秦筆良允  
晉史山濤始布衣家貧謂妻韓曰忍飢寒我後當爲三公不知卿堪公夫人否後人我做夫人便做得過

只看你福命如何正翻用其語

曲洧舊聞劉道原日記萬言終身不忘壯輿亦能記五千壯輿之子所記才三千晁以道戲壯輿曰更兩世當與我相似

葉石林問予兄惇濟曰自東坡名思無邪齋德有鄰堂世爭以三字名堂宇前此有否惇濟曰非獅子吼寺乎石林笑曰是也詳曲洧舊聞

羅泌路史宛丘有義神寶注實者對虛之名

後漢書郡國志注釋慧遠廬山記略有匡俗先生出殷周之際隱居此山時謂所止爲僊人之廬而命焉豫章舊志匡俗字君平夏禹之苗裔也宋曾幾茶山集詩巖巖匡俗廬頂踵極高大

舊唐書武后問狄仁傑曰朕要一好漢任使有乎仁傑乃薦張柬之按此好漢二字所本新書易爲奇士通鑑易爲佳士皆不如好漢朴老正不嫌其俚俗也古今對謂當稱奇男子亦太做作蓋紀實之文與雕繪之辭自不同體所以三傳多方言也

史記載晁錯父稱錯爲公如上初卽位公爲政及口語多怨公吾去公歸矣之類是父亦稱子爲公也古今對疑當時公亦而汝之通稱宋蔡京稱子攸爲公豈京亦本此與要之不可爲訓蔡謨之幾死勸學非勸學悞之也餓爲之驅也溫飛卿之悔讀南華非南華誤之也矜爲之累也以張華之博物而豐城劍氣必辨于雷煥嵩高竹簡必問之東哲况下此者邪

曲洧舊聞。唐以身言。審判設科。一時無不習書。故遺跡雖非知名之人。亦有可觀。後來此科廢。非性自好之者不習。工者甚少。勢使然也。

顏氏家訓。真草書迹。微須留意。江南諺云。尺牘書疏。千里面見。然此藝不須過精。夫巧者勞而智者憂。常爲人所役。使韋仲將遺戒深有以也。

秦程邈作隸。卽今楷書也。八分又漢人爲之。在隸後。今悞以八分爲隸。日知錄曾詳辨之。

漢書陳平傳。或讒平曰。平雖美丈夫。如冠玉耳。其中未必有也。孟康曰。飾冠以玉。光好外也。中非所有也。按今裁美如冠玉。作譽人語。殊失本旨。

宣和書譜。文章字畫。時以古今澆之。不爾。則塵生其閒。下筆便同衆人。

呂東萊曰。於實字看義理。於虛字審精神。

天下山河。秦得百二。齊得十二。顧亭林曰。二猶倍也。

世說。周顥曰。吾若萬里長江。何能不千里一曲。東方朔七諫。以直鈎而釣兮。又何魚之能得。爲人於斯。二者權之可矣。

賓退錄。漢人稱太守爲明府。縣令爲明庭。唐人稱縣令爲明府。後漢書陳蕃傳。大丈夫處世。當掃除天下。安事一室乎。杜少陵朝獻太清宮賦。隸事穎脫。清光大來。

鐵圍山叢談六卷宋蔡絛撰。絛爲京之子。其書大抵欲掩其父惡所稱叔父文正則卞也。伯兄則攸也。一門姦黨。標榜可笑。然其中亦有不滿其兄之意。京攸本互相傾。絛蓋黨父而畔兄者也。一門水火可笑。又孰甚焉。凡徽宗邪侈亡國之事。彼津津稱爲盛德。惟憾其仲道紺佛獲報。而昧其亡國之本。在不知爲君崇邪醜正。自底滅亡。小人之間於是乎是非。有錮之者耶。然其中所稱司馬公、東坡公。則又若等所目爲姦黨而立碑申禁以紳之者。茲之稱何爲者耶。毋亦其良心未能盡死而然與。而要亦其流竄之後。述數公以躋後世。若自附於正人者。若前之陷害已不與焉者。其亦何益之有哉。然觀其載司馬倅太原誤築堡一事。而仲父書法於蘇之上。仍未嘗不含蜂蠻之毒。於蟻幕之中。小人終爲小人而已矣。於其書反而觀之。以得姦宄之情。卽謂之供狀也可。所載佚事。未必盡確。然恢詭亦頗悅目。又未嘗不惜小人之有才。而誤用以至斯極也。

叢談。一府尹曰。夜來不能寐。偶讀孟子一卷。好甜。張臺卿曰。必非孟子。此定唐書。一座爲哄。

湛淵靜語二卷元白珽廷玉撰。頗有考據。摘錄於後。

文之繁簡。係乎人代。如春秋隕石于宋。五公羊傳聞其礪然。視之則石。察之則五。多經七字。義猶未盡。書曰。爾惟風下民。惟草論。語衍爲十六字。孟子又多二也字。至劉向載泄治子書曰。夫上之化下。猶風靡草。東風則草靡而西。西風則草靡而東。在風所由。而草爲之靡。衍爲三十一字。書曰。能自得師者王。謂人莫己若者亡。劉向載楚莊王之言曰。其君賢君也。而又有師者王。其君下君也。而羣臣又莫君若者亡。衍

爲二十五字。古者及漢人用字。毛詩序刺不壹也。經文其儀一兮。孟子市價不貳。趙注無貳價也。周禮天官參謂卿三人。伍謂大夫五人。周禮注編縣之四八曰肆。六六亡奇馬援傳今作陸陸可見皆通用也。眉州蘇先生呆明允之祖好施破產飢寒以終後三蘇以文章名世。思陵翰墨志云衛夫人名鑠字茂濶晉汝陰太守李矩妻又羊欣筆陣圖云尚書郎李充母以己姓衛自稱李衛充必矩之子又絳州帖云李氏衛和南蓋冠夫姓於上也。魏書許汜曰陳元龍豪氣不除昔嘗見之無主客意自上大牀臥使客臥下牀劉元德曰君有國士名今天下大亂望君憂國忘家而君求田問舍言無可采何緣當與君語如小人欲臥百尺樓上臥君於地何但上下牀之間耶如此當云元德百尺樓今用作元龍誤。

責備餘談二卷明方鵬廷撰其書責人無已痛斥蘇文忠尤爲妄誕今摘其平允者以備參考。叔孫昭子當徧告與國請盟三家共扶公室求君反國鞠躬盡瘁繼之以死此正命也。祈死而死非正命也。蓋踵范文子之故智而誤者也。微子抱祭器歸周非降之也果有何罪而以死自待耶。逢伯欲尊其君爲武王而厚誣微子爲亡國之虜蔡氏釋書遂取其說不亦誤乎。將在軍君命有所不受此管氏之說非六經之訓也。李牧誤執之被殺後人以此責岳武穆不知岳果執此賊檜益得以藉口而族之矣。王生令張釋之結襪貧賤驕人戰國之習也。釋之跪而結之專氣致柔黃老之術也。京房死於恭顯郭璞死於王敦謝石死於秦檜豈明於知人而暗於謀己耶。投機之會聞不容髮神宗感韓琦之疏面諭執政立罷新法安石遂稱疾不出陳升之等卽欲奉詔趙抃

獨曰新法皆安石所建不若俟其出罷之及安石再起持之益堅而宋社墟矣王昭明不肯鍛鍊歐陽修之獄黃經臣不誣陳了翁之詞邵成章能死陷洪州之難宦官有此三人當時縉紳猶多愧之陳無己卻衣凍死苦節不可貞者也錢思公上廁手不釋卷宋祁公走廁必挾書以往可謂勤矣然汚書實甚嘗見縕黃者流崇奉其書函之甚謹衛之甚嚴何吾儒之弗逮也張浚劾罷李綱浚闇於知人短於制敵輕師失律嫉賢惡能多可訾議或謂其類孔明不亦謬乎

方矯亭謂皋陶爲士師不知皋陶爲士乃刑官之長卽周大司徒士師乃屬官也豈非沿時文之訛不知考與

漢書張安世傳郎有醉小便殿上按小便二字使出後人手俗惡矣

漢書東方朔傳畢公高拾遺於後師古曰畢公高文王之子也爲周太師按論語邢疏同

楊用脩曰劉錡善射水斛滿以箭射拔箭水注隨以一矢望之或言卽剝注也

又曰呂溫地理圖志序粉散百川黛凝羣山

又曰隋潘徽撰萬字文

又曰爾雅疏爾近也雅正也謂其近於正也此妄言也但近正猶未得其正矣所載皆六經之言有何不正而云近正乎詩彼爾維何維常之華三蒼解詁云爾華繁也猶言麗也爾雅猶麗則也漢書文章爾雅訓辭深厚爾雅與深厚爲對豈近正之說乎

薛敬軒讀書錄謂無極非虛卽是天載之無聲無臭按上天之載無聲無臭正於太極上見蓋太極生兩儀天載特兩儀之一若無極則在太極前何得以天載當之總之無極之懸空索渺本支離之論腐儒之推衍無極者又支離之支離也瑄又謂本誠敬無欺之心至上下交孚而後能格心定國瑄坐視于忠肅之奇冤而不救格心定國何在理學家祇是說得好聽眞靜言庸違者也

嚴羽滄浪詩話太白天才豪放語多卒然而成者謂之開門見山按今人論文語本此

庾信哀江南賦狐假虎威實用楚國策虎不知獸畏己而走以爲畏狐事

沈歸愚幻雲閣記天下自有不幻者富貴幻矣能利濟民物則不幻文亂幻矣能脩明道德則不幻此身幻矣能實踐倫物則不幻且卽以雲言虧寸而合雨澤天下瘁者起槁者潤不有其功而功必歸之記曰天降時雨山川出雲則雲非幻者也眞實語未經人道歸愚又曰昔賢謂天與之資父母與之閒家與之溫飽身與之無疾病而後可以專力讀書

譚友夏太公墓銘不求於人而自銘焉明乎其有子也不求乎備而務實焉明乎其有恥也嗚呼此先君之指也最質實有味

池北偶談康熙二十三年以周公裔孫奉祀生員東野沛然世襲五經博士沛然自云昔魯公伯禽季子魚賜東野田一成因以爲氏其說本之東野志世表然所載世系名目恐亦未免附會  
顧庶其萬祺三餘贅筆三叔周之畔臣實殷之忠臣也

學齋佔畢史經 杜牧之阿房宮賦未雩何龍雩當作雲按前人有議龍字謬者觀此不禁洒然原非用左傳龍見而雩也。

予嘗有詩云王莽爲賊臣朱溫爲正統不知朱紫陽如何分輕重閱宋既庭實作黜梁紀年圖論不禁大快有云王莽不得爲新安祿山不得爲燕全忠豈得爲梁乎其時移檄興復唐室者有晉岐蜀淮南四國或爲唐之臣子或爲唐之賜族則唐實未嘗亡也當以晉岐淮南之稱天祐者爲主始於天祐四年至後唐莊宗同光元年而止亦春秋書公在乾侯之義也詳載池北偶談。

孫樵云史家紀職官山川地理禮樂衣服宜直書一時制度不得取前代名品王漁洋曰此病在唐人已有之近日錢牧齋艾千子訾謑滄溟弇州本此。

漁洋曰柳開論文曰古文非在詞澀言苦令人難讀在於古其理高其意然開河東集但覺苦澀何耶倪闍公燦文選疏解序云蔡中郎以反舌爲蝦蟆淮南子以蛩爲蟋蟀高誘以乾鵠爲蟋蟀文人謬誤自古已然是故無恙蟲也孟浪草也三戶亡秦三戶城也千里尋羹千里湖也破鏡飛上天破鏡獸也寒砧木葉亦城也徐夫人男子也許負老嫗也八日青精制火于食也五日競渡制火于水也介子推屈原之說無稽也按三戶有三說有指城者不在楚地楚雖三戶亡秦必楚自謂楚雖三家之少必亡秦趙雲崧陔餘叢攷曾辨之。

呂覽文王嗜昌歎蕡孔子聞而服之皮日休請立孟子爲學科書仲尼愛文王嗜昌歎以取味後之人

將愛仲尼者其嗜在乎孟子矣。麤之說歌合諸書而如一。今使必審齶人轉不識而嗤之矣。

後漢書馮異進光武麥飯兔肩。

養和卽靠背也。陸放翁詩天矯竹如意鱗皴松養和。

虞世南稱李守素爲倉曹人物志是倉曹指李官名拾遺記曹曾積石爲倉藏書號書倉是曹倉指曹倉也二字顛倒用皆有典而未可混。

國語蒙穀獻雞次之典雞次山名在德安。

說文依山前爲牛馬欄曰陸揚雄長楊賦序以綱爲周陸。

國語一純二精宋史樂志郊祀樂章帝饗於郊一精二純本國語而變其文。

陝人以茜染數珠謂之茜珠歷久不變。

西京雜記斬蛇劍開囊拔鞘風氣射人。

錦繖夫人隋書譙國夫人傳高涼洗氏女高涼大夫馮寶妻楊升菴曰夫人戰則錦繖寶幡至老未嘗敗。

年八十終智勇福三者俱全古今女將第一人也。

史注凡言除者除故官就新官按詩云何福不除恐卽借除爲授之意又唐宋以某官知某州某縣事是另有一官兼知此官事也若今之知府知州知縣則專爲一官而書銜者每亦云知某府事某州事某縣事亦誤書除字之類也。

朱子曰禮云僕人師扶左射人師扶右僕射之名蓋起于此楊用脩曰射當音赦不當音夜

實錄猶行述行狀之名不必定屬朝廷也李翹嘗自爲其皇祖考州司法參軍楚金實錄求韓文公銘其墓則實錄上下可通用矣然近日旣屬朝廷所用則宜謹避只從行述行狀爲安如朕字三代以前通用秦以後則不可矣

臧爲奴獲爲婢

蘇明允號老泉之訛以王伯厚之博洽猶誤稱之茶餘客話東坡得鐘山泉公書寄詩云寶公骨冷喚不聞卻有老泉來喚人果明允號老泉東坡敢作爾語乎惜不令焦文端見之也然此公知明允之不號老泉不知老泉實東坡號也余家藏東坡書歸去來辭墨蹟真本印文爲東坡居士老泉山人其確據也良齋雜說亦云東坡家有老泉故號老泉山人見之印章今以稱明允誤茶餘客話實竊之閻百詩潛邱劄記劄記亦載印章之說

或謂考亭非朱子所居然宋道學名臣言行錄晦翁晚居考亭作精舍曰滄洲號滄洲病叟又李梅亭代上楊提刑書十年身事於考亭未聞大道則以考亭稱朱子當時已然矣

楊升菴曰戰國策秦惠王時有寒泉子注云秦處士之號史記索隱甘茂號樗里子又范蠡稱鷁夷子此後人別號之所昉乎又曰宋人多云周有八士姓名叶四韻隨音駄音窩

廬山石鏡晨光初曜則延曜入室毫細必察出太平寰宇記延曜二字近人引用本此

劉臻熟讀漢書人稱漢聖。

凡引古有二例。有必注出處者。有不必注出處者。必注出處如古人引詩云書云之類是也。不必注出處如夫子言射不主皮。言爲山九仞。言草上之風之類是也。本此例而通之。大抵涉于考據者。必注出處。專言義理者。詳敍書名。雜于運用成言之内。便于文體有礙。此必待他人注者也。凡古文皆然。余之爲警書也。有人疑未盡注出處也。書此答之。

升菴外集宋時僧徒陋劣作語錄宋儒亦用之。

李穆堂曰。語錄本出佛家。後道學家無知之門人記其師語。亦曰語錄。不知其援儒而入釋也。兩橛字亦係釋氏俚語。儒者襲用可笑。按予所刊經學質疑錄亦屢用兩橛字。因李說追改。猶未盡也。

陸深燕閒錄民閒用宋金元錢謂之好錢。好錢不行。惟行新錢。謂之倒好。俗語倒好本此。

予嘗用世紛二字。人以爲杜撰。予一時難指其出典。閱洪邁御書閣記略于世紛萬殊泊無一嗜。是宋人已用之矣。

多填經語。是抄書非文也。然經語又不可少。祇在典要上引證一兩句。如地之有山焉。漫衍俚語。是語錄非文也。然俚語又不可少。祇在筋脈上透露一兩句。如肉之有骨焉。

以人情詰經而經愈顯矣。以比喩說理而理彌鮮矣。故曰。朽腐化於神奇。

吳可曰。新燒炕火。謂之燼火。見蘇武傳。燒湯謂之燉湯。見內則。竈中燒火。謂之煖竈。見戰國策。曉天赤如

霞者謂之陰淪見爾雅紀曉嵐曰爾雅無此文王逸楚辭注引陵陽子明經曰淪陰者日沒以後赤黃氣也又廣雅引之作渝陰吳蓋誤廣雅爲爾雅又舛亂其文耳後漢書中山王焉傳今五國各官騎百人稱婴註稱婴守捉也軍校名袁子才詩集屢用稱婴作行路狀似與本義迥別

魏志管輅傳到鼓一中註中半也

丁鴻漢人白虎觀與諸儒集論

宋史箋叟醬翁皆蜀隱君子

漢書藝文志太史以六體試學童注六體古文奇字篆書隸書繆篆蟲書師古曰繆篆謂其屈曲繚繞所以摹印章也

七脩類藁圖書古皆銅鑄王冕以花乳石易之

後漢書宦者蔡倫字敬仲造意用樹膚麻頭及敝布魚網以爲紙故稱蔡侯紙

癸辛雜志道學之名起于元祐盛于淳熙凡治財賦者目爲聚斂開闢打邊者目爲蠭才論書作文者目爲玩物喪志留心政治者目爲俗吏其所讀者四書近思錄通書太極圖東西銘語錄之類詩疏自二十至二十九皆爲盛年

董賢傳柱檻衣綉錦

說文已、已也。四月陽氣已出，陰氣已藏。吳才老韻譜辰巳之已，如已矣之已。顧亭林曰：季春之月，辰爲建巳，爲除，故用三月上巳祓除不祥。古人謂病愈爲已，亦此意。仇滄注曰：據此則辰巳之已，不當音士，當音以。

前漢陸賈傳乃欲以新造未集之越屈彊于此，註屈彊不柔服也。宋史秦檜謂趙鼎：此老嫗彊猶昔實本于此。蓋屈嫗通用也。又前漢書周昌傳贊周昌木彊人也。彊字書皆音彊去聲。韻書載二十四音，作上聲，無作平聲用者。

# 平書卷八

## 文藝篇下

文以法備氣至爲主氣至而法不備客氣也法備而氣不至死法也。

昌黎謂醕也而後肆焉文之道盡之矣理醕而筆肆理者文之主也無主則亂氣者文之輔也無輔則頗意者文之帥也無帥則潰辭者文之卒也無卒則衰格者文之陣也無陣則困筆者文之兵也無兵則鈍法者文之律也無律則敗度者文之禮也無禮則凶機者文之變化也無變化則窮趣者文之鼓吹也無鼓吹則悶書者文之蓄積也無蓄積則亡

文章妙處全在以無厚入有閒。

文有二妙曰奇曰拗。拗而諧。拗之善者也。奇而穩。奇之真者也。不諧不穩。不值一哂。

于平取奇于常取拗。

文章須于平實之中寓奧峭之致。平實者理也。奧峭者筆也。不平不實理不足。不奧不峭筆不足。

十三經之文平實奧峭兼者也。自莊列諸子至北宋大家奧峭有餘平實不足南宋以降平實有餘奧峭不足此古今一大關限。

十三經語盡神奇惟論語于極平淡中透出神奇故能籠罩一切莊子謂萬物一也臭腐化爲神奇神奇

復化爲臭腐。惟文亦然。讀古人書。臭腐也。成名家文。神奇也。食古不化。終于臭腐。雖多笑爲。文章理法易。才情難。運才情于理法尤難。理法可以人爲。才情必由天賦。肆才情而兼理法。則天人兩優。而文事乃造其極。古今數人而已。一人數篇而已。

古今有三語。至人至語。快人快語。妙人妙語。諸經多至語。諸史多快語。諸子集多妙語。古人爲文。有特造之句。有因習之句。二者未可偏廢。特造中須有因習。根柢係焉。孔子所謂述而不作也。因習中須有特造。穎悟存焉。孔子所謂溫故知新也。

文有二妙。一曰披卻導竅。尋虛逐微。一曰指事類情。堅光切響。

詩文必有一段精氣盤結。不可磨滅之處。方能成家垂久。

文貴周密。在理不在辭。前人之文。妙在不周密。而周密反餘于意言之外。後人之文。患在太周密。而周密反歉于意言之中。史記漢書。優劣已然。後世史書。愈趨愈下。職此故耳。

人有中行、狂狷、鄉原、鄙夫、數等。文亦如之。

經史子集。譬之穀也。講學考據諸書。譬之春穀爲米也。古今詩文。譬之蒸米作飯也。詩文之聲音采色。譬之酒醴肴饌也。

夏雲所以多奇峯者。乘陽氣盛也。氣盛則變化嵯峨。千彙萬狀。隨勢湧出。而不可方物。惟文亦然。初學爲文。有二要。曰法。曰筆。法猶陣也。必以練而熟。筆猶兵也。必以鍊而精。迨乎既熟且精。兵可忘陣。陣

可忘兵左旋右抽無不中的故曰文成法立意到筆隨意到筆隨意盡而止文成法立法與俱融

過求簡捷則說未備而理不員廣事徵尋則語多歧而義反晦

亂頭粗服之中自覺風光細膩亦祇山林佳趣天冊寶典何嘗不惻惻動人若脩飾而無骨兒女子態耳有所應有無所應無者上也補其所無盡其所有者次也有其所無無其所有者下而已矣貌離而神即者上也貌即而神即者次也貌即而神離者下而已矣

文章須有介氣不可有驕氣須有和氣不可有丐氣吾所見介非介也驕焉而已矣吾所見和非和也丐焉而已矣

起如天外轉如山外收如弦外情在性中趣在理中味在書中

用經避腐用史避蠹用子避蒙用集避野

理以無枝葉爲上文以有波瀾爲上枝葉非波瀾也理外之卮言耳波瀾非枝葉也文中之興會耳或欲斬除枝葉並波瀾而埽之是自困于潢池語人曰此江海之觀也誰其信之試取六經讀之波瀾何似無枝葉又何似

晉以前雖有九流文家約四而已曰古文曰詩賦曰注疏曰說部晉以後至今則有若四書文有若律詩律賦有若四六有若填詞有若語錄有若外卷有若佛經道藏學日雜而文日卑豈一端之故哉

楊用脩曰唐明皇詔謂進士以聲韻爲學多昧古今明經以佔誦爲功罕窮旨趣道盡唐人取士之病進士如許渾謂宋祖劉裕有三千歌舞至于張打油胡釘鉸極矣明經有謂堯舜爲一人班固與班孟堅爲兩人者按此則廢學之過不得獨歸咎于四書文矣夫以詩賦策論既如彼四書文復如此何也皆功利之心害之也一屬科舉則惟利是趨不能究心于學而幽莽滅裂之害無窮又天之生才豪傑少而凡民多所以固陋之習輒轉相仍也

楊用脩曰漢書律曆志引書曰先其秝命師古曰逸書也秝古算字俗士改作先算其命可笑甚矣古字不可輕改他如斠若晝一通鑑改作較不知斠勘斗斛也較車耳也其義殊遠陳平雖美如冠玉耳其中未必有也冠玉下去一耳字便失其指

穀梁傳公子友謂莒挾曰吾二人不相說士卒何罪屏左右而相搏公子友處下左右曰孟勞孟勞者魯之寶刀也公子友以殺之戰國策敍荆軻刺秦王左右曰王負劍及史記項王願與王挑戰語同一機抽順樂三逆樂三負彊壯軀幹天下事遇知心人談愜意語讀古今籍獲快暢文此之謂順常小疾病生謹慎念逢不曉事動自反情看翻板書悟訛別字此之謂逆吾于順之樂得一作文頗快耳于逆之樂蓋得三焉

予視楊用脩顧亭林閻百詩毛西河朱竹垞五先生之淵博望洋而歎然以言乎學有心得真知是非而以至平至允出之則未遑多讓

天下無無用之物。天下無無用之書。

李太白謂黃河落天走東海。萬里瀉入胸懷間。可以喻文心之奇。杜子美謂將軍下筆開生面。一洗萬古凡馬空。可以喻文品之眞。蘇子瞻謂當其下手風雨快。筆所未到氣已吞。可以喻文氣之雄。讀書與作文。須用破用逆坼得開。方合得攏。所謂于破獲全。翻得透。方發得清。所謂以逆取順。絜淨精微。乃文中至高之境。然實不可孤據。屬辭比事。疏通知遠。廣博易良。溫柔敦厚之體全。而文始備。孤削已甚者。必不與福爲鄰。刻劃太過者。每至與德相戾。

天倫之順。宮室之安。衣服之適。飲膳之宜。玩好之雅。加以讀書之樂。行文之快。必立心行善。方堪消此清福。

曹子桓言在乎文章彌患。凡舊若無新變。不能代雄誠格論也。

金劉氏祁歸潛志。文章各有體。不可相犯。故古文不宜蹈襲前人成語。當以奇異自彊。四六宜用前人成語。復不宜生鑿求異。

或曰。何以四六文不如散體。曰。天工人巧之別也。試觀雲霞變態。山川之詭勢。樹木之瓊形。無一齊者。而歸于不可方物。此散體之模範也。天工也。若四六之體。非所擬矣。人巧焉得而比之。然有雲構之自然。不可無棟宇之庇蔭。四六應世之文。何可廢乎。

楊用脩曰。宋大中祥符閒。注輦國入貢。表辭偶麗。當時天書尙可人爲。况外夷之表乎。按此知凡外國文

字多屬中國假託。被用脩慧眼勘破。

曲洧舊聞爲帥守踵父祖嘗所居衣冠以爲榮事歐陽棐弼叔知蔡州父文忠公之舊治也謝宰執啓曰惟近輔之名邦實先人之舊治高城不改自疑華表之歸老吏幾希尙守朱門之舊追懷今昔倍劇悲欣翟公巽守會稽父思之舊治也謝表曰朱邑世祠猶有奉嘗之舊恬侯家法自憐孝謹之衰皆謂是也

元豐閒四明唱和詩序慚非白雪之詞輒效青脣之唱趙元考謂青脣指婦人也見小說章惇被謫錢勰草詞云硜硜無大臣之體鞅鞅非少主之臣章甚銜之紹聖初召拜首台曾布子宣草麻有赤烏几几對南山巖巖士夫戲語云今則几几巖巖昔何硜硜鞅鞅錢貶知池州東坡有云橫費之財猶可以力補既死之民不可以復生真保國者藥石之論也孔平仲爲陝西提刑謝表云呂刑三千人命所繫秦關百二地望匪輕晁無咎稱爲光前絕後韓師樸內徙謝表云轉徙風波獨在于近地歸還里閈最早于他人上讀此曰我固憐忠彥忠彥亦自知我也無盡居士召還謝表云三年去國門前之雀可羅一日還朝屋上之烏亦好當時傳誦亦不免爲有識所窺也

宋賢事彙孫宣公奭致仕語客有曰樂以忘憂自得古人之志歌而鼓缶不與大耋之嗟公始終全德近世少比又詔起范宣忠公鎮公辭曰六十三而求去蓋已引年七十九而復來豈云中禮池北偶談名非霸越乘舟難效于陶朱志切投秦出境遂稱于張祿此鄭準復姓表也見釣磯立談范文正全襲其語又蜀檮杌范禹偁冒姓張復姓啓昔年上第偶標張祿之名今日故園復作范睢之裔在文

正之前引用尤切

舊續聞。曾元豐代時相撰秋宴樂語頌聖德一聯云。惟天爲大。蕩蕩乎無能名焉。如日之升。鴻鵠乎不可尚已。坐客皆擊賞。又云。東坡十歲時擬歐公謝對衣金帶馬表有曰。匪伊垂之。帶有餘非。敢後也。馬不進。老蘇笑曰。此子他日當自用。後召入院謝表。各益以枯蠶之質。歛退之心二句。

又曰。洪容齋草親征詔曰。惟天惟祖宗方共扶于基緒。有民有社稷。敢自佚于宴安。又云。歲星臨于吳。分定成淝水之勳。鬪士倍于晉師。可決韓原之戰。又檄書云。爲劉氏左袒。飽聞思漢之忠。溪湯后東征。必慰戴商之望。汪浮溪王綽復官制曰。聖人之心。如權衡之公。法無私者。君子之過。如日月之食。人皆見之。靖康二年皇太后手詔。漢家之尾。十世宜光武之中興。獻公之子九人。惟重耳之尚在。

楊升菴曰。宋人書啓自敍云。性本聚晉。質惟木訥。范蔚宗香序聚膏。晉蒙語本此。

又曰。宋贈鄂王岳飛謚忠武文。李將軍口不出辭。聞者流涕。蘭相如身雖已死。凜然猶生云云。今猶沿稱武穆。蓋前謚也。宜以忠武爲正。

近日學者于董江都王文中之書。未嘗開卷。卽韓昌黎之文。亦如隔膜。惟勦襲宋儒刻覈之論。隨聲詆斥。至于陸文安之學。亦未夢見。或謂其遺問學。則曰。遺問學也。或謂其宗頓悟。則曰。宗頓悟也。其實陸子之書。具在。何嘗有此二端。一犬吠影。百犬吠聲。并爲一談。牢不可破。此種策略。只好當囁語聽耳。乙未六月十三日爲兒輩點定李禮理學策書此。

徐文長渭爲胡宗憲上嚴嵩啓有云知我比于生我益徵古語之非虛感恩思以報恩其柰昊天之罔極人品掃地矣

明流賊檄文云君非甚暗孤立而煬蔽恆多臣盡行私比黨而公忠絕少獄囚累累士無報禮之心征歛重重民有偕亡之恨三岡志略載爲周鍾降賊筆沈確士曾辨之或傳黎志陞筆爲賊草檄罪無可逭然其言未嘗非當日切弊也吁亦可慨矣

成周盛時卿大夫三年大比攷其德行道藝興其賢者能者以禮賓乃獻賢能之書于王後世鄉舉之名蓋出于此然所謂攷乃就平日言之豈就一日之長短任一夫之去取也哉又況取者不必長而去者不必短也

王制升之司徒曰選士司徒論選士之秀者而升之學曰俊士今之貢生似之升于司徒者不征于鄉升于學者不征于司徒曰造士今之舉人似之大樂正論造士之秀者以告于王而升諸司馬曰進士今仍其名然名同而實則否矣

唐楊綰疏古之選士必取行實自隋煬帝始置進士科猶試策而已至高宗時進士加雜文明經加帖括從此成俗公卿以此待士長老以此訓子其明經則誦帖括以僥倖又令舉人投牒自應如此欲其返淳樸崇廉讓何可得也請置孝廉科令縣令取仁著鄉間學知經術者薦之按後世科舉之法已不可盡廢鄉舉里選已不可專行如綰之議令州縣兼舉行實仍嚴濫舉之罰厚得舉之賞或亦得人之一法也

曲洧舊聞朱弁少章科舉自罷詩賦以後士趨時好專以三經義爲捷徑非徒不觀史而于所習經外他經及諸子無復有讀之者故于古今人物及治亂興衰之迹亦漫不省元祐初有舉人程文云古有董仲舒不知何代人與定陵時省試舉子于簾前請云堯舜是一事是兩事同可笑也按宋時已如此自明以四書文取士不通今古者更如恒河沙矣

莊子謂自大視細者不明自細視大者不盡此古今文古律詩所以難兼美也

事兼束縛與馳驟依樣葫蘆豈薄技譬如拈題作時文一縷脈繫微妙旨多少詩古文辭家掉頭弗屑挂牙齒一朝執筆就繩墨更駕跡弛不成理乃知傳神阿堵中慘澹匠心幾生死趙雲崧贈寫照沈錦詩云爾古今文界畫譬諸雜畫與寫真最確

古文之道博而其弊也雜四書文之道精而其弊也空救空惟字字尋來歷則必周覽羣書語語求包羅則必窮究事變而以精運博亦古文之支流也有明諸大家及本朝熊劉李方之徒庶幾焉亦無憾于爲四書文矣至昧者爲之既不能精而適得乎空或曰彼滿紙經語何空也嗚呼此其所以不精而空也蓋于本文之語脈神理如墜雲霧而所填之經又從稗販而來雜湊臃腫正如病傷寒人陽明滿腔燥糞非大攻大下其疾不瘳攻下之後祇一尪羸皮殼謂非空極也哉又三代以後事蹟既以口氣限之適便庸鄙東晉不觀卽觀之而心源否塞初不知聖經語言包羅萬古皆有此等事實在內持之無故言之無物更空疏之尤者也時文令人廢學豈苟論哉然謂學四書文必無扶危定變之才則不可明朝于忠肅王

文成、張文忠、非皆學四書文者耶。使竟其用，何讓古人大抵以言取人，實無良法。舒元輿之甲賦律詩，是倫姪經語。侮聖人之徒也。蘇子瞻之則詩賦策論，均爲無益矣。雖知其無用，然自祖宗以來，莫之廢者，以爲設法取士，不過如此也。又曰：近世士人，類經史綱目，謂之策括，待問條目，搜抉盡臨時剽竊，眞易首尾以眩。有司有司，莫能辨也。且其爲文也，無規矩準繩，故學之易成，無聲病對偶，故考之難精。又曰：人才有定分，施之有政，能否自彰。今進士日夜治經傳子史，貫穿馳騁，可謂博矣。至于臨政，曷嘗用其一二？顧視舊學，以爲虛器。論之詳矣。卽王介甫所謂困天下于無補之學者，由今視之，亦非僅此一體也。至四書文大家，亦有不檢之處，如曲肱而枕，讀作上聲，皋陶爲士，誤作士師之類。明人于典制一體實疏，然無損其他美。閻百詩拈定發議，大毀諸家，然使其與諸家角藝，得毋牴胸絕脰也哉。且士師之誤，始于唐人宋蔡沈闡入書傳，又不得獨歸罪于四書文也。四書文與古文氣脈相聯，大家必以古文局段行之，其實古文難而易，四書文易而難。古文非根柢深厚，筆力堅彊，不能道其隻字，故難，可以我行我法則易也。四書文雖村學究，可敷衍成篇，故易，而非于聖學實有所得。高才博辨，總無是處，則難也。要知四書文可廢，古文必不可廢，則不易之論也。

乾隆九年大學士鄂爾泰等謹奏，共議舒赫德敬籌取士之方一摺，據稱今之時文空言不適實用云云。謹按取士之法，三代以上出于學，漢以後出于科舉。科舉之法，每代不同，而自明至今，則皆出于時藝。三代尚矣。漢法近古，終不能復古。自漢以後，累代變法不一，而及其既也，莫不有弊。九品中正之弊，毀譽出于一人之口，至于賢愚不辨，閥閱相高。劉毅所云下品無高門，上品無寒士者，是也。科舉之弊，詩賦則祇尚浮華，而全無實用。明經則專事記誦，而文義不通。唐趙匡舉所謂習非所用，用非所習，當官少稱職吏。

者是也。時藝之弊，則今舒赫德所奏是也。夫時藝取士自明至今，殆四百年，久知其弊而守之不變者，非不欲變，誠以變之而未有良法以善其後，且就此而責其實，亦未嘗不適于實用，而未可槩訾也。夫時藝所論，皆孔孟之真傳，精微之奧旨，未有不深明書理而得稱爲佳文者。今徒見世之腐爛鈔襲，以爲無用，不知諸大家皆冥搜幽討，殫智畢精，殆于聖賢之義理，心領神會，融液貫通，然後參之經史子集，以發其光華，範之規矩準繩，以密其法律，而後乃稱爲文。雖曰小技，而文武幹濟，英偉特達之才，未嘗不出其中。至于姦邪之人，迂懦之士，本于性成，雖不工文，亦不能免。未可以爲時藝咎。若今之鈔襲腐爛，乃事久生弊，不思力挽末流之失，而轉咎作法之涼，不已過乎。必變今之治行古之制，則將治宮室，養游士，百里之內置官立師，獄訟聽于上，是軍旅謀于上，又將簡不率教者，屏之遠方，終身不齒。其母乃徒爲紛擾，而不可行，又况人心不古，上以實求，下以名應，興孝則必有割股廬墓以邀名者矣，興廉則必有惡衣菲食，敝車羸馬，以飾節者矣。相率爲僞，其弊尤繁。近日所舉孝廉方正，曾庸人之不若，又何益乎？若乃無大更改，仍不過求之語言文字之間，則論策今所見行詩賦，亦未嘗廢。至于口問經義，背誦疏文，如古所謂帖括者，又僅可資記誦，而于文義，多致面牆。其餘若三傳科、史科、名法書學、算學、崇文、宏文生等，或駭雜放紛，或偏長曲技，尤不足以崇聖學，而勵真才矣。則莫若懲循名之失，求責實之效，由今之道，振作補救之爲得也。然此亦特就文學而言耳。至于人之賢愚能否，有非文字所能決定者，立法取士，不過如是，而治亂盛衰，初不由此無俟更張定制爲也。

沈碪士曰。八股興而古學廢。有問以經史而瞠目不識何語者。然其人往往取科第去。而枕經席史之人。湮鬱以終。雖然。一耽浮華。一探闡奧。古人有云。各從所好。士之輕一時志千古者。尙堅其志哉。或譏時文家拘守宋儒者。如入桃花源。不復知有漢。無論魏晉。可謂雅謔。

天下之物。至俗者莫如錢。而至利莫如錢。古今之文。至俗者莫如時文。而至利者莫如時文。此爲乾坤二圈。昏濁者溺入錢圈。卽清明者亦難出時文圈也。其實二圈實一圈。殆如太極生兩儀乎。

言之可共守而樂傳者。必其簡易者也。如科舉所行之易。朱子本義書。蔡沈集傳。詩朱集傳。禮陳澔集說。其倍謬可笑者甚多。然衆守之而不廢者。爲其簡也。漢注唐疏。精詳不啻十倍。而人不觀。爲其煩也。卽四書朱注之盛行。亦簡之故也。簡有得有失。

本朝御纂各經。詳明完美。而不責人以必從。所以寬待中材也。有志之士。本注疏之精詳者。發爲文章。售者不勝枚舉。何嘗以異于朱注而遭屏哉。

方望溪以明人多死節者歸于讀朱子集註之功。當日有菜傭湯之瓊及乞丐死節者。豈讀集註者耶。李巖牛金星以舉人從賊。生員之開城迎降者。比比而有。非讀集註者耶。偏袒者議論之愚而可笑。甚矣哉。池北偶談。予嘗見一布衣。有詩名者。其詩多格格不達。以問汪鈍翁。汪云。此坐未嘗解爲時文耳。故理路終不分明。王惲玉堂嘉話。鹿菴先生曰。作文字。當從科舉中來。不然。汗漫披猖。是出入不由戶也。按袁簡齋說亦如此。高明者不可不知。

歐陽公與樂秀才書時文雖浮巧然其爲功亦不易也僕天資不好而彊爲之故比時人之爲者尤不工然已足以取祿仕而竊名譽者順時故也觀此無怪今之專讀考墨卷者矣

古文之氣宜巖而剛時文則當排巖入細鍊剛爲柔故時文興而古文廢

薄經學者妄尊時文者愚

經學可以該科舉科舉必不可盡經學

經史子集猶五穀時文猶米瀋也日從事于時文而忘經史子集者猶以瀋易穀也

讀書原爲明義理化氣質達時務而設詩文其末耳然就文藝正可爲讀書之法如學古文則就古文以貫羣書學詩賦卽就詩賦以貫羣書卽四書文亦無不可貫也然必以明義理化氣質達時務爲主文藝特其所假之途徑耳此爲本末一貫之學專爲學時文應舉讀書此猶飯從脊梁上過

四書文體高明者多攻之如閻百詩毛西河朱竹垞其最著也然細思之且夫嘗思古文亦不爲禁若曰本之尙書以句法論整句仍四六之體散句仍古文之體總之論學與不學讀書與不讀書有心得與無心得體非其疵也

譏文家者曰獺祭曰擣扯曰偷拆經語曰集中作賊曰緝綴小文曰稗販得來然皆不可少也特必有本以貫之耳其本亦曰明理而已矣理明則辭達而意以主之筆以運之機以宣之調以諧之則所謂獺祭擣扯偷拆稗販之類皆如金銀銅鐵融于洪爐鑄鼎象物而出之不見其爲金銀銅鐵只見其爲完渾精

瑩之一鼎然則理也者。文之鼎也。由偷拆經語而精之。卽昌黎約六經之旨而成文也。由集中作賊而精之。卽昌黎纂言必提其要。紀事必鉤其元也。願世之爲文者。毋爲古人大言所欺。而不得其方也。若夫專以獺祭爲事。而不求明理。則終于餽飣之俗學而已矣。雖多奚以爲。讀書作文。以領悟爲上。無所領悟。雖十年八年歸于無益。有所領悟。雖一刻兩刻。可以有功。

閻百詩謂從古文章之體。無代他人語言者。始于元之套曲。四書文體似之。袁子才亦謂時文如優伶扮戲。讒如伯寮。惡如陽虎。亦將代其語言。以予論之。尚書王若曰。卽代人言體。古詩如焦仲卿一篇。代爲詩人之類。亦代人之言語也。由此推之。歷代之制誥。及史官紀錄。皆代人言體。古詩如焦仲卿一篇。代爲詩人言語。何謂始于套曲。至代伯寮之類。左史記小人之言。備極纖悉。亦鑄鼎象姦之意。時文之可議。在空疏與庸濫。不在代言也。

時文之益有十。藉此通四書。以明義理。一也。讀經以求根柢。二也。讀史以悉情變。三也。讀諸子以長筆力。四也。學古文以立間架。五也。考諸儒論說之得失。六也可以熟天理人情。七也可以反己自脩。八也。爲時所用。先資拜獻。致君澤民。九也。光祖宗蔭子孫。十也。時文之害。亦有十。腹無書卷。游談無根。不知古今。空疏蒙昧。一也。讀書不暇。詳考源委。信手填寫。文義不通。二也。漸染庸腔俗調。闡入詩古文。面目皆庸。如油入麪。不可祓濯。三也。拘于宋儒一偏之說。使聖賢精義埋沒沈淵。四也。明知宋儒之弊。誘于利祿。彊爲偏袒。尤壞心術。五也。經書本賴。七十二子而成。墮宋儒惡習。極口詆斥諸賢。以夫子之道。反害夫子。莫此爲

甚六也。自明至今數百年陳言勦襲架屋疊牀已成敗局七也。專作語言文字看待忘卻身心爲何物靜言庸違莫此爲甚八也。一入高頭講章腐爛考墨窠臼不知人情世務爲何竟成廢物九也。以仁義道德之說爲徇私利己之謀僥倖得仕誤盡蒼生十也。



壬辰孟冬望迄仲冬朔冒冷排纂成此與所著經學質疑錄讀易類紀及警書相爲表裏未必非學術之權衡也重甫跋

予遊四方此冊不離左右稱心者輒書之甲午自吳淪齋學使幕中歸里重編一過博洽不及前人雜考諸編平尤敢自信焉或曰子之理解多得于朱文公文學多得于韓蘇諸公皆不諱其短何也曰此其所以爲平也詩不云乎圜有樹檀其下維蕝記不云乎好而知其惡榆邨又識



先父著述三十二種皆生平精力所聚其尤注意者則在易象通義質疑錄讀書比事警書讀史贅言文鈔詩鈔詩話詩家隅見楚詩心賞集至平書八卷亦朝夕不離左右者嘗以論事平允自信非尤注意者乎道光己酉洪水爲災瓦古未有居室漂蕩幾盡書籍竭力救出不知幾費經營易象通義及詩文鈔等書予館各處常攜手邊平書及詩話等編存二弟本徵處咸豐甲寅粵匪肆虐楚省蔓延幾遍窮鄉僻壤無處不擾二弟僑居垌冢地近阜市財富之區賊匪聚集尤衆肆擾殆無虛日烽火頻警避賊時攜書藏趙家場之趙氏祖祠事平後二弟往取則有趙永吉訓蒙祠中他書失者尙少平書則前四卷僅存後四卷烏有矣託趙代覓值其酣醉後大相齟齬後託友人代覓音信杳然乙卯春賊復擾楚奔走不遑無暇及書已丙辰歲予館李采珊瑚學博書齋知平書殘缺如骨鯁在喉非不託人代求卒不可得中秋後與三弟本支挾平書前冊奔往趙祠擬託人窮覓廣懸招帖許其厚謝以冀必得然事已三年得不得未可知也及到趙祠則永吉仍館其中一見如故禮貌之隆情意之洽與前之醉時先後判若兩人及談至平書則已代爲覓得矣予喜出意表不啻天外得來璧返趙廷珠還合浦豈有加諸以己酉奇水所漂沒不知幾千萬倍于此者以數年粵匪所焚燬不知幾億萬倍于此者以茲殘帙歷劫無恙且以失去三年復還原主古云典守者子孫呵護者鬼神謂非鬼神呵護吾不信矣職司典守者其可稍懈乎前四卷予三伏時課徒之暇揮汗疾書不論字之工拙業已鈔成副本茲擬將下四卷鈔全適有大梁之遊飢驅奔走不能自如爰囑二第三弟各鈔一卷從子業乾詩學頗有可觀深服平書議論之允因倩其代鈔一卷以期

平書識

二

速竣合成全帙。與原本分置二處。以待將來校葉。雖不知此願得償與否。聊存兩帙。或不至均失。記此更俾子孫知所保守云。咸豐六年歲次丙辰八月二十五日本祖謹識于李氏書屋。

